

ҲИҒУН

АСАРЛАР

ОЛТИ ТОМЛИК

**АБУ РАЙҲОН
БЕРУНИЙ**

**ТҮРТ ПАРДА,
БЕШ КҮРИНИШЛИ ТАРИХИЙ ДРАМА**

ҚАТНАШУВЧИЛАР

Абу Райҳон Беруний — улуг олим.
Ибн Сино — буюк олим.
Гулсанам — Берунийнинг севгилиси.
Қоплон Ботир — Хоразм деҳқонларидан, мироб.
Жаъфар — Берунийнинг шогирди.
Худойберди — Ибн Синонинг шогирди.
Ибн Ироқ } — олимлар.
Масиҳий } — олимлар.
Маъмун — Хоразм шоҳи.
Маҳмуд Фазнавий — Фазна султони.
Суҳайлий — Маъмуннинг вазири.
Маймандий — Маҳмуднинг вазири.
Дабир — Маъмуннинг соҳир девони.
Шайхалислом } — Хоразм руҳонийларидан.
Аъзам } — Хоразмдаги элчиси.
Қоратегин — Маҳмуднинг Хоразмдаги элчиси.
Сайёра — Маҳмуднинг синглиси, Маъмуннинг хотини.
Масъуд — Маҳмуднинг ўғли, шаҳзода.
Унсурӣ — Маҳмуднинг пири, сарой шоӣри.
Сополегин } — Маҳмуднинг лашкарбошиларидан
Ора Ботир } — Маҳмуднинг лашкарбошиларидан.
Жайҳунбек } — Хоразм бекларидан.
Шунқорбек } — Хоразм бекларидан.
Сухсур — Сайёранинг канизакларида.
Мунажжим } — олимлардан.
Кимёгар } — олимлардан.
Элчи — Бағод халифасининг элчиси.
Заргар — Хоразм заргарларидан.
Бибисора — камбагал аёл.
Жаллод — Маҳмуднинг жаллоди.
Мулоғизим — Маъмуннинг мулоғизимларидан.

Беклар, руҳонийлар, лашкарбошилар, мулоғизимлар,
канизаклар, навкарлар, элчилар, соқчилар ва бошқалар.

ПРОЛОГ

Саҳна қоронғи. Қоронғиликда Қоратегининг бақириғи әши-
тилади: «Қани, тезроқ олдимга туш, Абу Райҳон Беруний!» Саҳна
аста-секин ёришади. Нурда Беруний кўринади. Унинг қўл ва оёқла-
рига кишан солинган.

Беруний

Бу замонда донолар хор, иззатдадир жоҳиллар,
Бу замонда ўраб олган, чирмаб олган омонсиз
Ҳақиқатнинг чечагини ҳақсизликнинг печаги!
Бу замонда кесилар тил тўғри сўзни сўзласанг.
Бу замонда инсонларни халос этиб зулматдан
Фан йўлига бошлаганлар бошдан жудо бўлади.
Аҳли урфон қон йиглайди замонанинг зулмидан,
Хавф остида олимларнинг, шоирларнинг ҳаёти.
Қанча олим қатл этилди, Фирдавсийни қувдилар.
Мана, менинг қўлларимга оғир кишан солдилар.
Ибн Сино, Ибн Ироқ, Масиҳийнинг тақдири
Меникидан афзал эмас! Зулм, зулмат, жаҳолат
Хуруж қилган бир замонда доноларнинг ҳоли танг!
Мана, менинг ҳаётимнинг бир лавҳасин кўрганда,
Сўзларимнинг ростлигига ишонурсиз, шубҳасиз...

Саҳна аста-секин яна қоронғиликка чўмади.

БИРИНЧИ ПАРДА

**Хоразмшоқ саройи. Серҳашам, гўзал хоналардан бири. Ўртада
тилла тахт, атрофида олтин курсилар.
Жаъфар билан Худойберди хонани тартибга
солмоқдалар.**

Жаъфар

(курсиларни қўя туриб)

Бу томонда жоҳиллару бу томонда олимлар!
Бу томонда алломалар, бу томонда золимлар.

Худойберди

**Ҳай, ҳай, дўстим, ҳазиллашма! Агар билиб қолишиша,
Сомон тиқар теримизга! Эҳтиёт шарт! Эҳтиёт!**

Жаъфар

Билиб қўйки, қўрқоқ одам ҳеч вақт олим бўлолмас!

Худойберди

Берунийдай бўлиш керак демоқчисан!..

Жаъфар

**Ҳа, ўлма!
Берунийдай бўлиш керак олим бўлмоқчи бўлган.**

Берунийдай дадил, ботир, ҳеч нарсадан ҳайиқмас,
Ҳеч нарсадан қўрқмайдиган бошқа зотни билмайман!

Худойберди

Зеҳни ўткир, ақли расо әмиш Абу Райҳоннинг...

Жаъфар

Үқимаган китоби йўқ, ўрганмаган тили йўқ,
Арабу форс, юону ҳинд, яҳудийлар тилини
Она тили каби билур. Ҳамма фанни ўрганган:
Тарих, ҳисоб, жуғрофия, илми нужум, фалсафа,
Тил илмини яхши билур, кимёниг устаси.
Мусиқадан, шеъриятдан хабари бор мукаммал.
Хуллас, устод билмайдиган илм йўқдир дунёда.
У Афлотун ва Арасту, Суқрот ҳаким, Форобий
Таълимотин сувдай билар, расо чаққан мағзини.
У фанга фан қўшган олим, илму фанни бойитган.
Бу замонда Берунийга тенг келувчи олим йўқ!
У замоннинг алломаси, донишманди, доҳийси!
Бунга мисол у яратган «Ал-боқия» китоби!

Худойберди

(курсида турған зар муқовали «Ал-боқия»ни олиб кўзига суртади, ўпади)

«Ал-боқия!», «Ал-боқия!»

Жаъфар

Китобларнинг сultononi!

«Ал-боқия» — фан бошига кийгизилган олтин тож!
Бу китобда араб ва форс, юон, румо, яҳудий,
Суғд, Хоразм, Миср, Хитой, турк ва бошқа ҳалқларнинг
Солномаси, урфу одат, дини, байрам, тўйлари,
Маросими, тарихлари тўла баён әтилган.
Ҳа, ўзининг олимлиги, әътиқоди туфайли
Муллаларнинг ғазабига учраб, даҳрий саналиб,
Хоразмдан қувилганди йигирма уч ёшида!
Шундан кейин узоқ йиллар қувгинларда яшади.
У сарсону саргардонлик азобини кўп тортди.

Аммо олим ҳаммасига бардош берди, чидади,
Тақдир әкан, оқибатда яна қайтди ватанга.
Ватанини — Хоразмни жондан ортиқ севади,
Журжон шоҳи Вашимгирнинг саройида турганда,
Изват-икром кўрганда ҳам Хоразмни қўмсарди.

Х у д о й б е р д и

Хоразмшоҳ, ҳақиқатан, илму фанинг ошиғи!
Ҳа, шоҳимиз Бухородан, Самарқанддан, Бағдоддан,
Нишопурдан, Кашмир, Ҳирот, Мисру Балху Шероздан
Юзлаб олим, шоирларни саройига тўплади.
Илми дониш ташкил әтди. Мана, бугун Хоразм
Илму урфон ривож топган мамлакатга айланди.

Ж а ъ ф а р

Аммо ҳали жоҳиллар ҳам Хоразмда етарли,
Жаҳолатнинг кони бўлган мутаассиб муллолар
Фанга қарши қиличини филофидан суғурган,
Ҳа, ҳали жанг тугамаган. Мунозара авжида.

Бир неча мулозимлар билан вазир Суҳайлий киради.
Мулозимлар қўлларидағи гулоб, шарбат ва шароб қўйилган кўумуш
кўзачаларни ва заррин қадаҳларни курсиларга қўйишида.

С у ҳ а й л и й

Ҳа, жойларни боплабсизлар!

Ж а ъ ф а р

Жой тахт, вазир аъзам.

С у ҳ а й л и й

Баракалло дидингизга! Ҳа, дидингиз жойида.

Шайхулислом, Аълам, мулдалар ва элчилар
киришида.

Жаъфар

Марҳамат, тақсирлар, мана жойингиз.

Суҳайлий

Салом сизга, Шайхулислом! Салом сизга муллаар!

Шайхулислом

Ҳа, саломат бўлинг, вазир. Ҳаммангиэга саломлар.

Суҳайлий

Қани, аввал, тақсирларга шарбат тутинг, томоқни
Пича ҳўллаб олишсинлар, мунозара олдидан.

Кулишади.

Шайхулислом

Биэга шарбат!

Қоратегин

Бизга шароб!

Жаъфар

Ҳаммаси ҳам муҳайё!

Мулозимлар қадаҳларга шарбат, шароб қуйиб меҳмонларга тұтади-
лар. Дабир бошлиқ олимлар киришади.

Худойберди

Марҳамат, донолар, мана жойингиз.

Олимлар кўрсатилган жойларга ўтиришади. Мулозимлар уларга
ҳам шарбат, шароб улашадилар.

Қоратегин

Абу Райҳон, Ибн Сино кўринмайди?

Д а б и р

Келурлар.

Қ о р а т е г и н

Жамоатни кутдиришдан хунук нарса бўлмайди!

Д а б и р

*Ахир, әлчи жаноблари, ҳозиргина келдингиз,
Нега бунча шошиласиз?*

Қ о р а т е г и н

Ишим зарур. Ишим кўп!

Д а б и р

Ундаёт бўлса кета қолинг, баҳс сизсиз ҳам ўтади.

Қ о р а т е г и н

*Мен Маҳмуднинг әлчисиман! Менга дағал гапирманг!
Даражамга лойиқ иззат-ҳурмат талаб қиласмен!*

С у ҳ а й л и й

*Узр, әлчи жаноблари, кўп қизишманг. Беруний
Ҳозир келур.*

А ъ л а м

*Ҳа, тўғри-да! Ҳа, аслида биз әмас,
Улар бизни кутишлари лозим! Одоб шунақа!*

Беруний билан Ибн Сино киришади. Олимлар уларга ҳурмат ювасидан оёққа турадилар. Уларга әргашиб муллалар ҳам беихтиёр ўринларидан туришади. Фақат Қоратегин ўрнидан қўзгалмай, гердайиб ўтираверади.

Б е р у н и й

*Узр, етук уламолар, узр, улуғ олимлар.
Аҳли сарой, биз сизларни бир оз кутдириб қўйдик,
Ногаҳонда бир хаста чол келиб мадад сўради.*

~~Иўқ дейишга ҳеч бўлмади. Ибн Сино иккимиз
Кечга қолдик даво қилиб хаста чолнинг дардига.~~

Ибн Ироқ

Кўп савоб иш қилибсизлар!

Масижий

Тангри сизга ёр бўлсин!

Шайхулислом

Хоразмга хуш келибсиз, Абу Райхон Беруний!

Беруний

Ватанимга қайтганимдан бениҳоя хурсандман,
Мени бунда таклиф этган шоҳимиздан мамнунман.
Умлари, давлатлари яна зиёда бўлсин!

Ибн Сино

Кўп улуғ иш, кўп савоб иш қилди улуғ шоҳимиз,
Берунийдай алломани Хоразмга қайтариб.

Дабир

Хоразмнинг шуҳратига шуҳрат қўшар Беруний
Анжумани донишимиз энди равнақ топади.

Масижий

Ал Хоразмийнинг юрти яна битта донишманд
Ва забардаст алломага эга бўлди!

Ибн Ироқ

Офарин!

Б е р у н и й

Миннатдорман, азиз дўстлар... Аммо менинг нархимни
 Кўп ошириб юбордингиз... Муболага шеърга
 Ярашади... Мен аслида бир меҳнаткаш олимман...

С у ҳ а й л и й

Камтарликка кўп устасиз, Абу Райхон Беруний!

Б е р у н и й

Қуллуқ, амир. Йўқ, ишонинг, ҳали қиаган ишим оз.
 Ҳақиқатда қилган ишдан қиладиган ишим кўп.

М а с и ҳ и й

Бу дунёда тугармиди тадқиқоти олимнинг?

Б е р у н и й

Ҳа, ҳали кўп изланишлар, тажрибалар олдинда,
 Ҳа, Ҳиндистон ҳақида ҳам асар ёзиш орзум бор.
 Илми нужум, риёзиёт, жуғрофия ҳақида
 Рисолалар ёзмоқчиман, хуллас, дўстлар, ишим кўп.
 Фан бобида кичкина бир ҳақиқатни кашф этмоқ
 Игна билан қудуқ қазиш каби жуда мушкулдир.

А ъ л а м

Ҳа, гапингиз мутлақо рост. Мен кузатиб юрибман
 Ишингизнинг чаласи кўп, хатоси ҳам анча бор.

Д а б и р

(кулиб)

Мунозара бошландими?

А ъ л а м

Бу шунчаки бир луқма.

Мулозимлар, соқчилар, бир тўда сарой аъёнилари билан бирга Маъмун киради. Ҳамма ўрнидан туриб, таъзим билан шоҳни қарши олади.

Маъмун

Узр, пича ҳаялладим.

Суҳайлий

Зарари йўқ, шаҳаншоҳ.

Шоҳ тахтга, бошқалар жойларига ўтиришадилар.

Маъмун

Абу Райхон, Ибн Сино, бениҳоя хурсандман
Сизлар билан бир замонда бирга яшаганимдан.
Фан, бодининг боғбонисиз, илму ҳикмат заргари,
Қуёш бўлиб нур сочасиз маърифат гулшанига!

Беруний

Куллуқ, шоҳим.

Ибн Сино

Миннатдормиз.

Беруний

Дуодамиз сиз учун.

Маъмун

Ҳа, жамоат жам бўлибди, баҳсимиизни бошлайлик.

Дабир

Амрингизга мунтазирмиз.

Маъмун

Хўб, қани ким бошлайди?

Мунаҗжим

Рұхсат әтинг менга, шоҳим, агар лозим кўрсангиз...

Маъмун

Хўб, мардамат.

Мунаҗжим

Илми нужум, мунаҷжимлар ҳақида
Фикрингизни билмоқчиман.

Беруний

Хўб, фикримни айтаман.

Илми нужум ажойиб фан. Мунаҷжимлик яхши касб.
Мен ҳам илми нужум билан қизиқаман, биларсиз.
Бир вақт Қиёт яқинида расадхона қурганман,
Кузатгали юлдузларнинг самодаги сайрини.
Қуёш, Зуҳро, Мирриҳ, Зуҳал, Аторуд, Ой, Муштарий
Қўзимизни кўкка чорлар, инсон, бизни ўрган, деб.
Қайдан қайга сайд әтади осмон тўла юлдузлар?
Қайси бири сайдёраю қайси бири событдир?
Қайси бири айланади, қайси бири муаллақ?
Айланувчи кўкми, Ерми, юлдузларми, Қуёшми?
Мунаҷжимлар шу жумбоқча жавоб ахтармоқдалар.
Мунаҷжимлар юлдузларнинг турли ҳаракатини
Ҳолатини ўргандилар. Қадим юонон, ҳинд, араб
Олимлари сайдёralар, событларни ўрганиб,
Само ёритқичларининг кўп сирини очдилар...

Шайхулислом

Улар даҳрий! Улар кофир!

Аълам

Улар қаллоб! Фирибгар!

Б е р у н и й

Бу гапингиз тўғри, Аълам, мунажжимлар ичида
Сиз айтгандай, қаллоблар ҳам топилади, чунончи,
Қуръаандоз мунажжимлар олим эмас, фирибгар!

М у на ж ж и м

Демак, менинг қуръаларим, сизча, ёлғон экан-да!

Б е р у н и й

Минг афсуски, шундай тақсир.

М у на ж ж и м

Ахир, қуръаандозлар,
Қуръачилик минг йиллардан бери давом этади.
Кўп табаррук китобларда бу ҳақда сўз айтилган.

Б е р у н и й

Бари ёлғон! Уйдирма гап!

М у на ж ж и м

Е алҳазар! Таажжуб!

Б е р у н и й

Ҳа, таажжуб, минг йилдирки, қуръаандоз фолбинлар
Содда, жоҳил одамларни роса алдаб келдилар.
Минг йиллардан бери фанга раҳна солур бу иллат.
Юлдузларнинг авзоига қараб қуръа очмоқлик
Ўтакетган лўттибозлиқ!

М у на ж ж и м

Агар исбот қиласам-чи?

Б е р у н и й

Ёлғон гапни исбот қилиш мумкин эмас, мавлоно!
Инсонларнинг тақдирига юлдузларнинг дахли йўқ!

Мұна ж җим

Бу фикрға қўшилмайман!

Б е р у н и й

Үзларидаги ихтиёр,

К и м ё г а р

Менинг ҳам бир саволим бор, агар рухсат этсалар.

М а ҃ т ы ү н

Хўб, марҳамат, эшитайлик.

К и м ё г а р

Абу Райҳон Беруний,

Кимёгарлар мөхнатига қандай баҳо берасиз?

Б е р у н и й

Жуда юксак баҳо!

К и м ё г а р

Раҳмат. Ундаи бўлса айтиңгчи,
Яъни, мисдан олтин қилиб бўладими?

Б е р у н и й

Бўлмайди!

Ҳар маъданинг ўзига хос хислати бор, ҳар жисм
Ўз жинсига, ўз таркиби, ўз мағзига эгадир.
Бинобарин, руҳдан кумуш, мисдан олтин бўлмайди.

К и м ё г а р

Ахир, ўтмиш замонларда...

Б е р у н и й

Хабарим бор, мавлоно,
Мисдан олтин ясайман деб, кўп кимёгар уринган,
Аммо ҳеч ким ниятига етолмаган.

К и м ё г а р

Бу ҳақда

Мен жуда кўп китобларни мутолаа қилганман,
Кўп китобда мисдан қандай олтин ясаш усули
Кўрсатилган.

Б е р у н и й

Бари ёлғон, уларга ҳеч ишонманг!
У китоблар фанга хилоф, ҳақиқатдан йироқдир.
Бу иш билан неча йилдан бери шуғулланасиз?

К и м ё г а р

Ўн йил бўлди...

Б е р у н и й

Хўш, натижা?

К и м ё г а р

Охирига етган йўқ...

Б е р у н и й

Етмайди ҳам! Эсиз, умр беҳудага сарф бўлган!

К и м ё г а р

Умидворман, бир кун әмас, бир кун олтин топаман!

Б е р у н и й

Кондан топиш мумкин, аммо, мисдан олтин бўлмайди.

Ким ёгар

Шоҳим, яна, пича маблағ ажратсалар...

Маъмун

Демак, елга соврилибди ҳисоби йўқ маблағлар...
Қани, ҳазрат, энди сиздан әшитайлик!

Шайхулислом

(«Ал-боқия»ни қўлга олиб)

Хўб, шоҳим.
Бу китобда Муҳаммаднинг ҳаётини сиз оддий
Одамларнинг ҳаётидай содда таъриф этибсиз.
Ахир, ҳамма билади-ку, у пайғамбар! У расул!

Беруний

Буни ҳеч ким инкор әтмас. Лекин унинг ҳаёти,
Таржимаи ҳоли равшан, қилган иши аниқdir.
Муҳаммад ҳам инсон әди сизу бизга ўхшаган.

Шайхулислом

Бизни унга тенглаштирманг! У илоҳий бир сиймол

Аълам

У тангрининг әлчисидир бизга ваҳий келтирган!

Беруний

Ахир у ҳам инсонлардек бир онадан туғилган.
Қабиласи Қурайш әди, Ҳошим әди отаси.
У туғилди, у яшади, у курашди, сўнг ўлди...

Аълам

Парвардигор, гуноҳлардан ўзинг асрал

Б е р у н и й

Сўзимнинг

Елрони йўқ!

И б н С и н о

Китобларда зикр этилган ҳаммаси.

Б е р у н и й

Пайғамбарлар, авлиёлар келиб кетган беҳисоб,
Мусо, Исо, Яъқуб, Довуд, етмиш беш минг пайғамбар
Тарихларда зикр этилур, ўйлайманки, билурсиз.
Муҳаммад ҳам ўшаларнинг бири әди.

А Ҷ л а м

Сўнггиси!

Ш а й х у л и с л о м

Ҳа, Муҳаммад саллалоҳу алайҳу вассаллам әнг сўнгги
пайғамбар! У парвардигори оламнинг әнг севикли расули!

А Ҷ л а м

У донишманд, доно әди!

Б е р у н и й

Тўғри, зукко, донишманд,
Кўп ақлли ва тадбиркор бир зот әди, шубҳасиз.
Аммо у ҳам инсон әди, бу ёғини унутманг!
Ҳа, тақсирлар, бу дунёда кўп воқеа юз берган.
Ҳа, бу кўҳна дунё кўпдан можаролар маскани.
Ҳар пайғамбар янги бир дин яратарди, динлар кўп.
Эътиқодлар, мазҳаблар кўп, тариқатлар, йўллар кўп.
Тариқатлар, мазҳабларнинг талошидан, жангидан
Ер юзини қоплаб олди қирғин, даҳшат, ҳалокат.
Чунки ҳеч ҳалқ ҳоҳиш билан эски динни тарқ әтиб,
Янги динга кирган эмас, бунга тарих гувоҳдир.
Динлар қурол кучи билан тарқатилган доимо.

Вайрон бўлган мамлакатлар, ёндирилган шаҳарлар,
Пайғамбарлар қиличидан ўтказилган шўрликлар,
Бизни асло унутманг, деб кўз ўнгида турибди!
Ҳа, тарихнинг ҳар вараги, ҳар бетида қон изи!

Шайхулислом

Ўтган ишга салавот деб, айтишмаган бекорга.
Истиқболни ўйлаш керак. Титган билан тарихни
Фойда чиқмас, ишимизга манфаати тегмайди.

Аъзам

Фақатгина мўминларни тўғри йўлдан оздирур!

Қоратегин

Фуқаронинг миясини айнитади!

Шайхулислом

Ҳаққос рост!

Беруний

Истиқболда яшаш қийин, билмай туриб ўтмишни,
Ўтмишини унугланлар келажакда хор бўлур.
Истиқболни ўйлаганлар ўтмишни ҳам ўйлади.
Келажакнинг муаммоси бошланади ўтмишдан.
Аждодларнинг тажрибаси мадад берур авлодга.
Тарих бизга устод әрур, тарих бизга муаллим.
Ўрганмасдан туриб тарих сабоқларин, истиқбол —
Авлодларнинг тақдирини белгиламоқ мушкулдир.

Шайхулислом

Бу шаккоклик! Бу даҳрийлик! Авлодларнинг тақдирин
Тангри ўзи белгилайди!

Аъзам

Ҳа, барча иш худодан!
Аллақандай тарих эмас, тангри биэга мураббий!

Шайхулислом

Бу дунёда нима мавжуд, нимаики юз берса,
Фақатгина тангримизнинг каромати, хоҳиши!

Аълам

Тангримизнинг хоҳишисиз содир бўлмас ҳеч нарса!

Ибн Сино

Ўт кетса ҳам тангримизнинг хоҳишими?

Аълам

Хоҳиши!

Ибн Сино

Ўлат келса, вабо бўлса буларни ҳам тангрининг
Хоҳишига боғлаймизми?

Шайхулислом

Ҳа, албатта боғлаймиз!
Булар осий бандаларга тангримизнинг жазоси!

Ибн Сино

Ундай бўлса, ўтга қарши, селга қарши курашмоқ,
Вабо, ўлат, оғатларга қарши кураш тангрининг
Хоҳишига қарши кураш бўлмайдими?

Шайхулислом

Чалғитманг!

Ибн Сино

Йўқ, тақсирлар, ҳар нарсани тангримизнинг хоҳиши,
Истагига боғлаш хато, туҳмат эрур тангрига!

Аълам

Е, алҳазар! Бу қандай гап! Тақсир, гапирсангиз-чи!

Шайхулислом

Қўя беринг, охиратда жавоб берур ўзлари!

Ибн Сино

Ахир, қанча-қанча золим, босқинчилар, фотиҳлар
Қанча элни шафқат қилмай таладилар, қирдилар,
Искандарнинг қирғинлари, Қутайбанинг босқини,
Хўш, булар ҳам тангриимиёнинг хоҳишига боғлиқми?

Шайхулислом

Қутайбага тил тегизманг! У исломнинг шунқори!
Дини ислом лашкарига сардор бўлган қаҳрамон!
У адашган гумроҳларни ҳақ йўлига бошлаган.
Қутайбани ёмонламанг! У авлиё, у ғозий!

Беруний

Ҳа, тақсирим, сиз мақтаган ўша ғозий Қутайба
Ҳоразмга олов қўйиб, даҳшат солиб келганди.
У ҳам битта золим эди қиличидан қон томган.

Шайхулислом

Бу иблиснинг сўзи эрур!

Аълам

Бу даҳрийлик! Бас қилинг!

Маъмун

Сабр қилинг, Абу Райҳон тамом этсин сўзини,
Бу илмий баҳс, мунозара, жанжал эмас, тақсирлар!
Ахир, қуруқ раддиядан кимга фойда, тақсирим?
Қўлингиздан келса агар исбот қилинг аксини!
Ҳа, илмий баҳс ҳақоратмас, исбот талаб қилади!

Шайхулислом

Кечирасиз, шоҳим, аммо,

Маъмун

Давом этинг, Беруний!

Беруний

Ҳа, Қутайба юртимизни босиб, янчиб келганда,
Хоразмда жуда юксак маданият бор эди.
Хоразмнинг кутубхона, саройлари, боғлари,
Китоблари, ёзувлари мавжуд эди. Қутайба —
Ҳаммасини хароб этди, китобларни ёндириди,
Саводи бор одамларни битта қўймай ўлдириди,
То ўтмишдан ному нишон қолмасин деб Қутайба!
Ҳа, Қутайба отларининг туёқлари остида
Аждодларнинг каллалари, жасадлари депсалган!
Қандай қилиб яширасиз ҳақиқатни, тақсирлар?

Ибн Сино

Қутайбанинг лашкарлари қилич билан, куч билан
Аждодларни мажбур этган янги динга киришга.
Бир қўлида яшил ялов, бир қўлида қиличи,
Дарё-дарё қон оқизиб даҳшат солган Қутайба!

Шаъхулислом

Ибн Сино, бу сўзингиз куфронга сўз! Тавба, денг!

Ибн Сино

Тақсир, аввал ҳақиқатни айтиб олай, тавбага
Кечикмасмиз. Гуноҳ қилсак тангри ўзи кечирар.
Аммо ҳақ сўз тангрига ҳам хуш келур деб ўйлайман.

Беруний

Ҳа, ўтмишни унутмаймиз, кўр бўламиз унутсан!

Тарих гувоҳ: босқинчилар қонли найрангларини
Дин номидан қилиб келди ва ҳозир ҳам қилмоқда.
Дин, шариат, тангри номи ниқоб бўлди уларга.

Шайхулислом

Ахир, шоҳим, бу гапларнинг замирида шаккоклик,
Ва даҳрийлик ётибди-ку! Бас қилишсин! Илтимос!

Қоратегин

Шоҳим, сизнинг сабрингизга қойил қолдим. Бу гаплар
Агар султон саройида айтилганда, ҳеч сўзсиз,
Икковининг тилини ҳам шартта қирқишар әрди!

Беруний

Яхшики, биз султон Маҳмуд саройида әмасмиз.

Ибн Сино

Ха, элчининг сўзлари рост, ҳеч бир мубобағасиз,
Ҳар қанақа иш келади султон Маҳмуд қўлидан!

Қоратегин

Султонимга тил теккизманг! Сўнг пушаймон бўласиз!

Маъмун

(базовта)

Биз мавзудан чиқиб кетдик, бу ҳақда сўз тўхтасин!
Ха, тақсирлар, тарихимиз, ўтмишимиз ҳақида
«Ал-боқия» китобида яхши гаплар айтилган.
Ўйлаймизки, бу китобнинг элга нафи кўп бўлур.

Шайхулислом

Кечирсингар, шоҳим, бизнинг шубҳамиз бор. Бу китоб
Мўминларга ёмон таъсир кўрсатиши муқаррар!
Бу китобнинг мазмуни зид қуръон таълимотига!

Аълам

Бу китобни куйдирардик агар имкон бўлганда!

Ибн Сино

Бу китобнинг нусхалари жаҳон бўйлаб тарқалган,
Ҳаммасини ёндиришга етармикан вақтингиз?

Масижий

Бу китобни ёндирурсиз, аммо унинг мазмуни
Илму урфон оламида азал-абад қолади!

Маъмун

Майли, ҳар ким ўз фикрида қола қолсин, ҳақи бор,
Энди бўлак бир мавзуга ўтсан яхши бўларди.

Қоратегин

Кечирсинглар, шоҳим, менда савол бор.

Маъмун

Марҳамат!

Қоратегин

Хўш, Беруний, нима учун гайридинлар ҳақида
Ва уларнинг русумлари тўғрисида муҳаббат,
Ҳурмат билан сўз юритиб шариатни буздингиз?

Беруний

Мен ҳеч қачон шариатни бузмаганман, бузмайман,
Сиз гайридин деб атаган одамлар ҳам тангрининг
Бандалари! Уларни ҳам худо ўзи яратган!
Еки гапим нотўғрими?

Қоратегин

Тўғриликка тўғри-я...

Беруний

Ҳаммаси ҳам худо дейди, најжот истар худодан,
Ҳаммаси ҳам тангрилизнинг жаннатидан умидвор.
Ҳаммаси ҳам тангрилизнинг дўзахидан қўрқади!

Аълам

Улар кофир! Дўзахийдир! Дини ислом ёвидир!
Уларни ҳеч шафқат қилмай қириш керак! Сиз эса,
Уларни ҳам мусулмонлар қаторига қўйибсиз!

Беруний

Тақсир, қизиқ, Мусони ҳам, Исони ҳам эътироф
Қиласизу, умматлари дўзахий деб қарғайсиз,
Нега энди пайғамбарлар, авлиёлар азизу,
Шўринг қурғур умматлари бўлар экан гуноҳкор?

Шайхулислом

Бошимизни айлантирманг! Биз бандаи мўминлар
Шариатдан, тариқатдан бир энлик ҳам чиқмаймиз!

Беруний

Ахир, инсон онасидан туғилгандан на кофир,
На мусулмон, на мажусий бўлиб туғилмайди-ку!
Бинобарин ҳаммаси ҳам тангirimizning бандаси.
Ҳаммаси ҳам худди биздек яшаш учун ҳаққи бор!
Бири ўтга топинади, бири бутга чўқинар,
Бири эса тангри, дейди осмондаги қўёшни.
Ҳўқизга ҳам, илонга ҳам сифинувчи эллар бор.
Ҳаммасининг ўз анъана, ўз одати, ўз расми —
Маросими мавжуд эрур. Ҳаммасининг тақдири
Парвардигор томонидан белгиланиб қўйилган.

Аълам

Бу гапингиз тўғри, аммо...

Беруний

Бинобарин ҳамма ҳалқ
Эҳтиромга сазовордир. Маданият, илму фан
Соҳасига барча ҳалқ ҳам ҳисса қўшар баравар.
Бунга мисол Арабу Ҳинд, Юнон, Хитой, Хоразм,
Афлотунни, Арастуни билмайдиган одам йўқ.

Ахир, улар ғайридин-ку?! Ғайридин деб, уларнинг
Меросидан воз кечишилик тўғри бўлар эдими?

Ша й х у л и с л о м

Афлотуннинг, Арастунинг йўли бошқа...

Б е р у н и й

Тақсирим,
Сўзингизнинг мантиқи йўқ! Ҳа, дунёда Арасту,
Афлотундек илму фанга ҳисса қўшган олим кўп.
Ҳа, тақсирилар, илму фанни инсоният яратур.

И б н И р о қ

Маърифатнинг дарёсига томчи қўшар барча ҳалқ.

М а с и ҳ и й

Маданият, илму урофон башарият мулкидир.

И б н С и н о

Ҳа, олимлар бир-биридан ўрганади доимо,
Бир-бирини ҳурмат қилур қайси ирқдан бўлмасин,
Қайси тилда сўзлашмасин, қайси динда бўлмасин.

Ша й х у л и с л о м

Е алҳазар!

А Ҷ л а м

Бу қандай гап!

Б е р у н и й

Бу ҳақиқат, тақсирилар.

С у ҳ а й л и й

Ер юмалоқ дер эмишсиз, шу гап ростми?

Б е р у н и й

Ҳа, вазир.

Коинотга назар ташланг, ҳамма нарса юмaloқ.
Ою Қуёш, юлдузлар ҳам юмaloқдир, мавлоно.
Назар солинг, доирадир кўк ҳам, тақсир, уфқ ҳам.
Нега энди бу қонундан Ер мустасно бўлармиш?

А ъ л а м

Ер япалоқ! Бу ҳақиқат ҳаммамизга аёндир.

Б е р у н и й

(киноя билан)

Ер ҳўкизнинг шохидагу ҳўкиз балиқ устида...

А ъ л а м

Худди шундай! Бундан кулманг! Бу қуръонда айтилган!

И б н С и н о

(киноя билан)

Ҳа, тақсирлар, бу соҳада қийин сизга бас келиш.

Б е р у н и й

Ер юмaloқгина эмас, Ер ҳаракат қилади.
Қуёш эмас, аслида Ер айланади...

А ъ л а м

Е тавба!

С у ҳ а й л и й

Ундаи бўлса Ер устида турган барча жисмлар
Ҳар томонга сочилишиб кетмайдими?

Б е р у н и й

Йўқ, тақсир.
Чунки бутун жисмларни, худди оҳанрабодек,
Ер ўзига тортиб туар.

Ш а й х у л и с л о м

Бу гапингиз афсона!

Б е р у н и й

Кўкка қаранг, Ою Қуёш, сайёralар, событлар
Нега фақат бир томонга қараб айланишади?
Эҳтимол Ер айланару улар бари тек туар...

А ъ л а м

Е алҳазар!

Ш а й х у л и с л о м

Абу Райҳон, ўйлаб кўринг, тавба денг!

Б е р у н и й

Арастунинг таълимоти ўйлантирас одамни.
Бир қудрат бор ҳаракатга келтирувчи оламни.
Аммо олам абадийдир, дейди доно Арасту.
Улуғ олим Форобий ҳам бу фикрга қўшилган...

Ш а й х у л и с л о м

Сиз-чи?

Б е р у н и й

Биз ҳам қўшиламиш.

Ш а й х у л и с л о м

Катта хато қиласиз.

Б е р у н и й

Хато қилсак тангри бизни кечирап деб ўйлайман.

А ъ л а м

Еру кўкни парвардигор етти кунда яратган.
Дунё асли бебақодир, охирзамон бўлганда,
Кунпаякун бўлур олам, нишон қолмас дунёдан!

Б е р у н и й

(киноя билан)

Унга ҳали анча вақт бор, ҳозир тирик әканмиз,
Бу дунёнинг тақдирини ўйлашимиз керакдир.

Ш а й х у л и с л о м

Банда ожиз бу дунёнинг тақдирини ўйлашдан.
Парвардигор ўзи ўйлар. Ҳамма нарса худодан!

Б е р у н и й

Үндай бўлса нега тангри ақл берди инсонга?
Нима учун қулоқ берди? Нима учун кўз берди?
Нима учун идрок берди? Сезги берди? Ҳис берди?
Булар нега керак эди ишламаса инсонга?

Ш а й х у л и с л о м

Парвардигор ўзи билур.

Б е р у н и й

Йўқ, тақсирам, инсонлар
Атрофини қуршаб олган бу сеҳргар оламнинг
Овозига қулоқ солиб, уни кўриб кўз билан,
Ақл билан идрок этиб, сезиб сезги, ҳис билан,
Англамоқни истайдилар ҳақиқатни, дунёни!

Аълам

Банда ожиз бу дунёning асрорини англашдан!

Беруний

Дунё — моддий, Арастунинг, Форобийнинг фикрича,
Ҳамма нарса тўрт унсурдан пайдо бўлур дунёда.
Булар: тупроқ, ҳаво, сув, ўт. Булар ҳамма нарсанинг
Замирида, таркибида, мазмунида мавжуддир.
Табиатда қонуният, сабабият ҳокимдир.
Агар қўёш нур сочмаса, гул унмайди тупроқдан,
Тош ўридан қўзғалмайди, қўзғатмаса бирор куч.
Сув ҳамма вақт юқоридан паастга қараб оқади.
Қундуз куни кўк юзида қўринмайди юлдузлар.
Ҳар бир жисм қизитилса кенгаяди, совиса
Тораяди, қисилади — бу табиат қонуни.
Олимларнинг вазифаси қонунларни ўрганиш,
Ҳодисалар, жисмларнинг сабабини аниқлаш.

Шайхулислом

Абу Райҳон, ахир, бу гап бориб турган шаккоклик,
Даҳрийлик-ку?

Беруний

Мен, тақсирим, ҳақиқатни сўзладим.
Нега гоҳо ёмғир ёғар? Нега гоҳо қор ёғар?
Дўл нимаю қиров нима? Қандай пайдо бўлади?
Чақмоқ нима? Довул нима? Шамол қайдан келади?
Нима учун навбат билан ўзгаради фасллар?
Нима учун шимол совуқ, жануб иссиқ бўлади?
Зилзиланинг сабаби не? Қандай қилиб ёнар тоф
Пайдо бўлур Ер юзида? Нима учун булоқлар
Бири совуқ бўладиу бири иссиқ бўлади?
Нима учун ҳамма ерда тонг баравар отмайди?
Чинмочинда тонг отган кез Хоразмда нега тун?
Шулар каби минг хил савол биздан жавоб кутади.

Аълам

Ҳаммаси ҳам тангремизнинг каромати, қудрати!

Б е р у н и й

Йўқ, тақсирим, ҳаммасининг сабаби бор! Бесабаб
Табиатда ҳеч ҳодиса, ҳеч нарса юз бермайди.
Биз оламнинг тақдирини ўйлашимиз керакдир.

Ш а й х у л и с л о м

Охиратни кўпроқ ўйланг! Бу дунёни ўйламанг!
Ҳа, бу дунё ўткинчидир, бебақодир, ҳамма гап
У дунёда!

Б е р у н и й

У дунё деб бу дунёни унугтиш
Катта гуноҳ бўлур эди!

Ш а й х у л и с л о м

Нотўғридир гапингиз!

Б е р у н и й

Чунки дунё, тақсириларим, хавф остида турибди!
Ҳали қонхўр босқинчилар, тиниб-тинчиган эмас,
Жаҳон бўйлаб қиличидан қон оқизиб юрибди.

Қ о р а т е г и н

Бу гапингиз кимга шама?

Б е р у н и й

Фараз қилинг — султонга!

Ш а й х у л и с л о м

Абу Райҳон!

А ъ л а м

Бу қандай гап!

С у ҳ а й л и й

Ўйлаб сўзланг, Беруний.

Б е р у н и й

Ҳа, Маҳмуднинг оч кўзлари Хоразмга тикилган.
Хоразмнинг дабдабаси, Хоразмнинг бойлиги
Унга тинчлик берармиди?!

М а ъ м у н

(безовта)

Чиқиб кетдик мавзудан!

Бу мажлисда сиёsatдан сўз очмаслик мақбулроқ...

Қ о р а т е г и н

Султон Маҳмуд Хоразмга душман эмас!

Ш а й х у л и с л о м

Мутлақо!

Қ о р а т е г и н

Ҳа, Хоразм ислом юрти, қандай қилиб мусулмон
Мусулмонлар ўлкасига қарши қўшин тортади?!

Ш а й х у л и с л о м

Рост айтасиз! Султон Маҳмуд дини ислом ҳомийси!
У ҳеч қачон чиққан эмас каломулло сўзидан!
Султон фақат кофирларга қарши қўшин тортади.
Қаёқдаги йўқ гапларни айтиб, бизни қўрқитманг!

Б е р у н и й

Мунофиқлик ёмон иллат, омон бўлсак кўрармиз.

Шайхулислом

Бандаларни итоатга ва тавбага ўргатиш,
Бу дунёning лаззатидан воз кечишига чақириш,
Охиратни тушунтириш,— мана булар савоб иш!

Қоратегин

Сиз тақсирим, одамларни итоатга чорлайсиз,
Одамларга бу дунёning роҳатидан кечинглар,
Кеча-кундуз тангрилизга сажда қилинг, ёлворинг,
Охиратда тангри сизга ато қилур жаннатни,
Ҳуруғилмон хизмат қилур сизлар учун жаннатда,
Бу дунёда азоб чеккан у дунёда роҳатда,
Фароғатда бўлур дейсиз...

Шайхулислом

Бу ҳаққос рост! Ҳақиқат!

Беруний

Аммо, тақсир, нима учун бу гапларга ўзингиз
Амал қилмай келмоқдасиз?

Ибн Сино

Айтганлар-ку, мулланинг
Айтганини қилу, аммо қилганини қилма деб.

Беруний

Ҳа, ҳазратим, саккиз хотин, ўнга яқин канизак,
Йигирмата чўрию қул, данғиллама уйларнинг,
Боғу роғнинг эгасисиз! Бойлигингиз беҳисоб!
Кеча-кундуз айшу ишрат, жаннатда йўқ таомлар!
Буни кўрган бечора халқ, яланғочлар, гадолар
Қандай қилиб сўзингизга ишонади, тақсирим?!

Шайхулислом

Шоҳим, ахир бу исён-ку! Бу туҳмат-ку! Тўхтатинг!

Маъмун

Қандай қилиб түхмат бўлсин, тўғри гапни айтди-ку?
Саккиз хотин...

Шайхулислом

Бу тўғри-я... Аммо лекин шаҳаншоҳ,
Жамоатнинг орасида обрўйимни тўқмасин!

Беруний

(кулиб)

Узр, тақсир, бу ёгини ўйламабман.

Ибн Сино

(кулиб)

Бу узр

Кинояга ўхшаб кетди.

Кулишади.

Шайхулислом дарғазаб бўлиб, ўрнидан туриб кетади. Муллалар шовқин кўтарадилар. «Бу қандай гап! Бу биздан қулиш! Бу ҳақорат! Бу түхмат! Шайхулисломдан қулиш гуноҳ! Шаккоклар! Даҳрийлар! Бас қиласин!» каби сўзлар эшигилади. Шу пайт мулодзим кириб шоҳга таъзим қиласи, сўнг унга нома узатади. Ҳамма жим бўлади.

Мулодзим

Халифадан нома келди.

Маъмун

(номани очиб, унга кўз югуртиради)

Хўб, бўлмаса, шу билан
Баҳсимизни тўхтатайлик, мунозара бошқа кун
Давом этур. Ҳаммангизга жавоб. Вазир, Беруний,
Ибн Сино, Дабир сизлар ҳузуримда қолинглар.

Суҳайлий, Дабир, Беруний, Ибн Синодан бўлак ҳамма чиқиб кетади.

С у ҳ а й л и й

Шаҳаншоҳим, ҳушхабарми?

М а ъ м у н

Ҳа ва локин нозикроқ...

Менга қимматбаҳо сарпо юборибди Ҳалифа.

Яна «Давлатпаноҳ» ҳамда «Дини ислом безаги»

Деган унвон ато қилмиш...

С у ҳ а й л и й

Жуда яхши!

Д а б и р

Жуда соғз

С у ҳ а й л и й

Шаҳаншоҳим, астойдил муборакбод қиласиз!

Д а б и р

Олий унвон қутлуг бўлсин!

М а ъ м у н

Раҳмат... Аммо нимага

Бирданига менга бунча кўргазилмиш илтифот?

Мақсади не Ҳалифанинг? Бу илтифот тагида,

Биз билмаган бирор мақсад, бирор маъно йўқмикан?

С у ҳ а й л и й

Ўйлайманки, Ҳалифанинг ниятлари холисдир.

«Дини ислом безаги», деб олий унвон беришдан

Сизга ҳурмат ва муҳаббат кўргазишидир мақсади.

М а ъ м у н

Билолмадим... Абу Райҳон, сиз не дейсиз бу ҳақда?

Б е р у н и й

Назаримда бу илтифот замирида мақсад бор.
Хеч шубҳасиз. Халифа ҳам ҳайиқади Маҳмуддан.
Сизга бундай унвон бериб, сизга қарши Маҳмуднинг
Ғазабини қўзғатмоқчи бўлиши ҳам мумкинdir...
Агар Маҳмуд ғазабини Хоразмга қаратса,
Бағдод омон қолади, деб ўйлаши ҳам мумкинdir...
Ҳа, бу гаплар, агар Маҳмуд қулогига чалинса,
Ҳам ғазабдан, ҳам ҳасаддан ёрилгундек бўлади!

И б н С и н о

Еки сизга унвон бериб, Хоразмни улуғлаб,
Султон Маҳмуд хуружига чек қўймоқчи бўлгандир.

М а ъ м у н

Ҳа, ҳар ҳолда бежиз эмас, бу илтифот, бу унвон...
Шунинг учун бу борада унча шов-шув кўтармай,
Тантанани камроқ қилиб, Халифамиз юборған
Элчиларни, сарполарни мамлакатнинг чеккароқ
Бир шаҳрида қабул қилсак...

Б е р у н и й

Жуда мақбул гапингиз.

М а ъ м у н

Ундаи бўлса, сиз ўзингиз бошлиқ бўлинг бу ишга,
Ҳамроҳингиз Ибн Сино, Вазир, Дабир бўлсинлар.
Халифага мўлжалланган совға-салом ортилган
Карvon билан пешвоз чиқинг әлчиларнинг йўлига,
Элчиларни хурсанд қилинг, кутиб олинг яхшилаб.
Вазиятни тушунтиринг әлчиларга батафсил.

Б е р у н и й

Ҳўп бўлади, шоҳим.

М а ъ м у н

Раҳмат, яна битта илтимос!

Б е р у н и й

Эшитаман.

М а ъ м у н

Биламизки, сиз амални севмайсиз.
Аммо битта лавозим бор сиздан бўлак ҳеч киши
Уддасидан чиқолмайди, шуни сизга ҳавола
Қилмоқчиман...

Б е р у н и й

Қандай амал әкан, шоҳим?

М а ъ м у н

Бош мироб.

Сиз табиат, набототнинг, зироатнинг, сувларнинг,
Дарёларнинг тилини ҳам биладиган олимсиз.
Хоразмда бир қатра сув олтин билан баробар!
Ерларимиз сувга ташна, сувга муҳтоҷ дехқонлар.
Кўп хиёнат содир бўлур сувни тақсим қилишда.
Адолатлик одам турса бу кори хайр бошида,
Сувга сероб бўлур эди сувга ташна Хоразм.

Д а б и р

Ҳеч шубҳасиз, дехқонларнинг дуосини олурсиз.

Б е р у н и й

(пича ўйлагач)

Майли, шоҳим, мироб бўлсан бўлай, илмий ишимга
Ҳалал бермас деб ўйлайман...

И б н С и н о

Балки тегар фойдаси!
Ҳа, бу ҳалқнинг манфаати билан боғлиқ бўлган иш.
Ҳалқ ичида кўп юрасиз ҳамда ўжар Жайҳуннинг
Барча сири асрорини ўрганасиз мукаммал!

Маъмун

Вазир!

Сұҳайлий

Лаббай!

Маъмун

Берунийга яхши ҳовли берилсин!
Боги билан. Катта маош белгилансин.

Сұҳайлий

Хўп, шоҳим.

Маъмун

Хўб бўлмаса, алломалар, тайёрланинг сафарга!

Парда

ИККИНЧИ ПАРДА

Газна. Султон Маҳмуднинг ҳашаматли саройи. Сарой қимматбаҳо матолар, олтин, кумушлар, забарждадлар билан безатилган, тилло курсилар қўйилган, ерга ипак гиламлар, атлас қўрпачалар солинган. Султон Маҳмуд қутичалар, сандиқчалардаги қимматбаҳо тошларни, олтин, кумушларни, ҳар томондан келтирилган туҳфаларни қўздан кечирмоқда. Енида бош вазир Аҳмад ибн Ҳасан Маймандий.

Маймандий

(туҳфаларни кўрсатиб)

Мана булар Ҳиндистондан. Мана булар Эрондан.
Мана булар Бухородан. Мана булар Ҳитойдан.

Маҳмуд

(туҳфаларни қўздан кечириб, қўлига олиб кўриб).

Жуда ҳам оз... Жуда ҳам оз.. Нима, шуми ҳаммаси?

Маймандий

Ҳозирча шу.. Яна келур... Яна бўлур, султоним.

Маҳмуд

Ахир булар, улуғ вазир, дарёдан бир томчи-ку!
Биласиз-ку, харажат кўп, сарой, қўшин, юришлар.
Қурилишлар катта маблағ талаб қилур!

М а й м а н д и й

Биламан.

М а ҳ м у д

**Ҳеч бир сарой ҳашаматда, гўзалликда, бойлиқда
Менинг олий саройимга асло тенглашолмасин!
Ҳеч бир султон, ҳеч бир шоҳда менда бўлган бойликнинг
Ярими ҳам бўлмаслиги керак!**

М а й м а н д и й

Шундай, султоним.

М а ҳ м у д

**Бутун жаҳон хазинаси, бутун дунё бойлиги
Фақат менинг хазинамда бўлиши шарт!**

М а й м а н д и й

Шубҳасиз.

М а ҳ м у д

**Бағдод эмас, Урганж эмас, Газна бутун жаҳоннинг
Дабдабали марказига айланиши керакдир!**

М а й м а н д и й

Иншоолло, худди шундай бўлур, улуғ султоним!

М а ҳ м у д

Ҳали бутун мақсадимга етганим йўқ...

М а й м а н д и й

Етасиз!

М а ҳ м у д

Бутун дунё менга тобе бўлиши шарт!

Маймандий

Бўлади.

Маҳмуд

(ўйланади)

Нима учун шу чоққача Халифадан дарак йўқ?
Нима учун жавоб ёзмас мен юборган номага?
Халифа ҳам мендан қўрқар... Донғим уни қўрқитар...
Йўлимга гов бўлмоқчи у... Кучаймасин дейди-да!
Ҳа, зарбамга учраб бир кун қон йиглайди Халифа!

Маймандий

Вақти келур, Халифа ҳам қаршингизда тиз чўкур,
Бутун ислом оламига сиз ўзингиз халифа
Бўлмоғингиз керак, султон. Иншоолло, бўласиз.

Маҳмуд

Ҳа, айтганинг келсин, вазир...

Маймандий

Қариб қолган халифа.

Маҳмуд

Қарсак чалади. Мулоэзим киради.

Айтгил, қўшин бошлиқлари ҳузуримга кирсинлар.

Мулоэзим чиқиб кетади. Бир оздан сўнг лашкар бошилар
киришади.

Сополтегин

Улуғ султон, фармонингга мунтазирмиз!

Маҳмуд

Жуда соз!

Оға ботир, ҳолинг қалай?

Оға ботир

Ёмон эмас, султоним.

Маҳмуд

Яқин кунда янги юриш бошланади... Қўшинни
Тайёр тутиш зарур!

Оға ботир

Султон, қўшин жуда чарчаган,
Агар бир оз дам бермасак, қўшин ишдан чиқади.

Маҳмуд

(дарғазаб)

Дамни гўрда, у дунёда оладилар! Сен ўзинг
Чарчаганга ўхшаб қолдинг! Сен қўшиндан озодсан!

Оға ботир

Бутун умрим қўшин билан бирга ўтган, султоним!
Ахир, энди қариганда...

Маҳмуд

Гап қайтарма!

Оға ботир

Ахир, мен...
Сенинг учун жондан кечиб жангга кирдим неча бор!
Оқибати шу бўлдими?!

Маҳмуд

Жаллод!!

Оға ботир

Султон!

Маҳмуд

Беҳаёл
Қандай қилиб султонингга сўз қайтара оласан!

Жаллод киради.

Олиб чиқиб дорга осинг, бу ақлдан озганни!
Токи бўлак шаккокларга ўрнак бўлсин!

Жаллод

Қани, юр!

Жаллод боши этилган Оға ботирни олиб чиқиб кетади.

Маҳмуд

Сополтегин!

Сополтегин

Биз тайёрмиз фармонингга, султоним!
Қайга десанг, ўша ёққа қўшин ҳужум қилади,
Қачон десанг, ўша замон от қўямиз ёв сари!

Маҳмуд

Ана бу гап баҳодирнинг, қаҳрамоннинг гапидир!
Аскарларга тушунтиринг, агар юриш қилмасак
Қуролимиз занглаб қолур, ўлжалардан маҳруммиз.
Яқин кунда мен уларни ўлжага гарқ этаман!
Ҳа, яхшилаб боқинг отлар, аскарларни, филларни,
Ўқ-дори мўл, қурол-яроғ ҳар галгидай шай турсин!
Қўшин учун сарфланувчи харажатнинг чеки йўқ!
Қўшин учун доим очиқ хазинамнинг эшиги!
Бу гапларни тушунтиринг аскарларга, уқтиринг!

Сополтегин

Уқтирамиз, улуғ султон, қўшин сизга содиқдир!

Маҳмуд

(үйчан)

Е Ҳиндистон... Е Хоразм... Ҳа, бу ҳақда кейинроқ...
Сизга жавоб.

Лашкар бошилар таъзим билан чиқиб кетишади.

Харажатлар кўпаяди... Ҳолбуки,
Хазинанинг аҳволидан унча мамнун эмасман...

Маймандий

Ишоолло, хазинани бойитамиз, султоним.

Маҳмуд

Гайри динлар ҳам жонини, ҳам молини биз учун
Беришликка мажбур... Аммо мусулмонлар муаммо...
Ваҳоланки, мусулмонлар орасида бойлар кўп...
Савдогарлар, зодагонлар, беклар, аслзодалар...
Ҳа, уларнинг бисотида қанча-қанча бойлик бор!
Бир баҳона топилса-ю, улар қўлга олинса...

Маймандий

Сиз баҳона топ десангиз, топилади, султоним!

Маҳмуд

Ҳа, баъзи бир бойиб кетган зиқна мусулмонларни
Қарматий, деб айблангу шартта олинг бошини.
Молу мулки, ҳовли-жойи мусодара қилинсин!
Ё бошқа бир баҳонани топиш керак бўлади...
Балки улар менга қарши фитна қўзғамоқчиидир?!

Маймандий

(кулиб)

Амин бўлинг, улуғ султон, иложини топамиз.

Маҳмуд

Сўнгра ҳиндлар, кўчманчилар ҳамда бошқа вилоят
Аҳолиси кўпроқ солиқ тўласинлар!

Маймандий

Тўлайди.

Маҳмуд

Сўнг, шипшитиб қўйиш керак: беклар, аслзодалар
Бизга кўпроқ совға-салом, ҳадя йўллаб турсинлар!

Маймандий

Шипшитамиз, улуғ султон, қай йўл билан бўлмасин,
Хазинани бойитамиз.

Маҳмуд

Сўнг, кўчманчи элларнинг
Диёрига қўшин тортиб, талаб молу мулкини,
Ўзларини асир олиб сотиши керак қул қилиб.
Бу ҳам бир йўл хазинани бойитишига.

Маймандий

Шубҳасиз.

Маҳмуд

Ҳинди斯顿дан, Ҳоразмдан айғоқчилар келдими?

Маймандий

Баъзилари келди, султон, баъзилари келади.
Келтирилган маълумотлар солинмоқда тартибга.

Маҳмуд

Айғоқчилар, жосусларни кўпайтиринг, уларнинг
Хизматлари жуда муҳим...

Маймандий

Хўб бўлади, султоним.

Маҳмуд

Ҳа, Ҳиндистон ва Ҳоразм жуда ҳам бой ўлкалар...
Ҳа, эсимдан чиқай дебди, ҳарамни ҳам тозаланг.
Гўзаллари қолсин, аммо ёши қайтган жувонлар
Навкарларга улашилсин ё қул қилиб сотилсан,
Ҳарна пул-да...

Маймандий

Ҳеч шубҳасиз!

Маҳмуд

Ҳа, ўзинг ҳам танлаб ол.

Маймандий

Миннатдорман, улуғ султон, дуо қилиб юраман.

Маҳмуд

Биласан-ку, менинг учун бир кечадан ўтган қиз
Ортиқ мени қизиқтирмас. Ҳоҳлаганинг сеники.

Маймандий

Сиздан қолган нозанинлар бизлар учун табаррук.

Маҳмуд

Ҳа, янгилар ҳар галгидай ҳар хил ирқдан танлансан,
Ва уларнинг энг каттаси ўн олтидан ошмасин.

Маймандий

Амин бўлинг, улуғ султон, қаймоқлари тўпланур.

Маҳмуд

Ҳа, ҳарамни, улуғ вазир, тамомила янгиланг,
Биласиз-ку, яхши бўлур ҳар нарсанинг янгиси!

Маймандий

Шундай, шундай, янгиларнинг савобига ким етсин!

Маҳмуд

Ха, у дунё лаззатини тотиш учун аввало
Бу дунёнинг лаззатини тотиб кўриш лозимдир.

Маймандий

У дунёда қиладиган барча савоб ишларнинг
Бу дунёда машқини ол, деган гап бор!

Маҳмуд

(завқланиб)

Қани, қуй!

Маймандий заррин қадаҳларга май қуийиб, бирини Маҳмудга
узатади.

Маймандий

Мана, султон.

(Ичишади.)

Маҳмуд

Нимагадир, шу кечаю кундузда,
Хаёлимдан нари кетмас Ҳиндистон ва Ҳоразм...

Шошилиб шаҳзода Масъуд билан шоир Унсур ий
кирадилар.

Масъуд

Кечирасиз, улуғ султон...

Маҳмуд

(хурсанд)

О, шаҳзода! О, пирим!

М а съ у д

Сўрамасдан ёнингизга кирдик...

М а ҳ м у д

Уғлим, марҳамат!

Сиз учун ва пирим учун доим очиқ эшигим!

У н с у р и й

Зарур бир иш мажбур этди бизни бунда келишга.

М а съ у д

**Фирдавсийни телба филлар оёғининг остига
Ташланглар, деб буюрибсиз, гуноҳи не шоирнинг?**

М а ҳ м у д

**Ҳа, шаҳзодам, шунинг учун келдингиизми? Жуда соз!
У нобакор, у таги паст шоир учун бу ҳам оз!
Шоҳномада Эрон устун Турондан, деб ёзибди.
Исёнчилар исёнини мадҳ этибди Фирдавсий!
Босқинчилар ёмон дебди! Менга шама эмасми?!**

М а съ у д

Бу гапларни ким айтди?

М а ҳ м у д

Ҳа, мана, вазир Маймандий!

М а съ у д

Вазирингиз туҳмат қилмиш баҳоси йўқ шоирга!

М а ҳ м у д

Сабаб? Нега?!

Масъуд

Маймандийнинг Фирдавсийда қасди бор,
Чунки шоир лаганбардор вазирлардан кулади.

Унсур ий

Сиз адолат паноҳисиз, шафқат қилинг шоирга!
Ахир, султон, у Фирдавсий! У бир шоҳи шуаро!
Үндан улуғ шоир йўқдир ҳозир етти иқлимда!
Биз ҳаммамиз кичкинамиз Фирдавсийнинг олдида.

Маҳмуд

Пирим, шоҳи шуаро сиз! Ўзингизни камситманг!

Унсур ий

Агарда у қуёш бўлса, бизлар фақат заррамиз.
Фирдавсийга шафқат қилинг!

Масъуд

Еловорамиз, султоним!

Маҳмуд

Шоирларнинг, олимларнинг вазифаси султонни
Мадҳ этишилик, шуҳратини дунё бўйлаб тарқатмоқ!

Унсур ий

Сизга шуҳрат келтиради Фирдавсийнинг шуҳрати,
Агар уни қатл этсангиз шаънингизга доғ тушур.

Масъуд

Бутун дунё шоирлари бизга нафрат ўқийди.

Маҳмуд

(ўйланади)

Үндай бўлса, Фирдавсийни пойтахтдан жўнатинг,
Пойтахтим муҳтоҷ эмас ундай телба шоирга.

У н с у р и й

(хурсанда)

Шу бугуноқ Тус шаҳрига жўннатамиз, султоним.

М а с ъ у д

(Маҳмуднинг этагини ўпид)

Миннатдормиз, улуғ султон, кўп савоб иш қилдингиз!

М а ҳ м у д

Шаҳзодам, сен сўрамасанг, бузмас эдим ҳукмимни.
Пирим, сизни қаттиқ ҳурмат қилишимни биласиз.
Сиз ўртага тушмасангиз гуноҳидан ўтмасдим.

У н с у р и й

Куллуқ, султон, миннатдормиз.

М а с ъ у д

Миннатдормиз, отажон!

У н с у р и й, М а с ъ у д таъзим билан чиқиб кетишади.

М а ҳ м у д

Шоирларнинг имони йўқ...

М а й м а н д и й

Улар айёр, фирибгар.
Шайтонни ҳам алдашади, дарс беради иблисга.

М у л о з и м кириб таъзим қиласди.

М у л о з и м

Халифадан элчи келди.

Маҳмуд

Ҳа, ниҳоят! Айт, кирсинг!

Мулозим чиқиб кетади.

Қани, қандай хабар олиб келган экан, кўрайлик.

Элчи кириб таъзим қилади.

Элчи

Салом сизга, улуғ султон!

Маҳмуд

Вaalайкум ассалом!

Элчи

(Маҳмудга нома узатиб)

Шому саҳар дуо қилур ҳақингизга Ҳалифа,
Сизга бўлган ҳурматини изҳор этур туну кун.
Сизни ислом оламининг ғозийси деб билади.
Дини ислом, шариатнинг ҳомийси деб билади.

Маҳмуд

Калтароқ қил!

Элчи

Узр, султон...

Маҳмуд

Хушомадга ҳушим йўқ!

Элчи

Сизга фақат Ҳалифанинг сўзларини етказдим.

Маҳмуд

(Маймандийга Халифанинг мактубини бориб)

Қани, вазир, ўқиб кўринг, нима дебди Ҳалифа.

Маймандий

(номани очиб ўқииди)

«Султон Маҳмуд Газнавий, менга юборган мактубингни олдим, ўқидим, мақсадингни англадим. Сен хатингда Мовараунаҳрни менга ҳадя эт ва фармон бергилки, у ернинг фуқаролари ўз хоҳишлари билан менга итоат этсинглар. Акс ҳолда мен у ерларни қилич билан олурмен, дебсан. Шуни яхши билгилки, ислом оламида улардан мўмин-мусулмонроқ фуқаро йўқ. Мен сенинг талабингни ерига еткизолмайман. Агарда сен менинг амру фармонимсиз улар устига юриш қиласанг, барча ислом дунёсини сенга қарши оёқлантираман. Омин, тангри ҳаммамизни ўз паноҳида арасин! Имзо чекдим Ҳалифа Қодир. Бағдод.»

Маҳмуд

(дарғазаб)

Ана сенга Ҳалифанинг айёрги, пастлиги!
Салом бўлак, мактуб бўлак! Саломида мақтайди,
Аммо менинг талабимни рад этибди хатида!
Ҳа, элчига ўлим йўқ деб айтишади, бўлмаса,
Бундай совуқ хабар учун олар эдим бошингни!

Элчи

Улуғ султон, биласиз-ку, элчиларда гуноҳ йўқ.

Маҳмуд

Ҳалифангга бориб айтгил, энди гуноҳ ўзида,
Мингта жангчи филлар билан бориб Бағдод шаҳрини
Вайрон қилиб, кулларини тамом қўкка совуриб,
Тупроғини филларимга ортиб олиб келаман!
Султон Маҳмуд әмасман мен, агар шундай қилмасам!

Э л ч и

Ахир, султон...

М а ҳ м у д

Жўна, тезроқ! Газабимни, қаҳримни
Халифага тезроқ етказ! Огоҳ бўлсин қаҳримдан!

Э л ч и

Хўб бўлади, улуғ султон...

М а ҳ м у д

Шу бугуноқ жўнаб қол!

Э л ч и қўрқиб, таъзим билан тез чиқиб кетади.

Мен у айёр, у бетавфиқ Халифага Маҳмуднинг
Кимлигини кўрсатаман!

М а й м а н д и й

Улуғ султон, менимча,
Пича ўйлаш зарурроқقا ўхшаб қолди...

М а ҳ м у д

Нега? Хўш?!

М а й м а н д и й

Халифанинг айёрги аниқ. Биз ҳам айёрлик
Қилсан яхши бўлмасмикан?

М а ҳ м у д

Мақсадингни очиқ айт!

М а й м а н д и й

Маълум, ислом оламида халифанинг нуфузи,
Обрўси зўр. Аҳли ислом унга тамом бўйсунур,
Шунинг учун элакишмоқ яхши бўлмас у билан.

Маҳмуд

Нима қилиш керак дейсан? Очиқроқ айт фикрингни!

Майданий

Хоразмни олиш учун қўшин тортиш шартмикан?
Баъзан битта гўзал аёл минг қўшиндан афзалдир.

Маҳмуд

(ўйланади)

Ҳа, гапингга тушунгандай бўлдим, вазир... тасанно!
Хоразмшоҳ билан қуда бўлгил демоқчисан-да!
Ҳа, шоҳ Маъмун менга куёв бўлса ёмон бўлмасди...

Майданий

Евлик әмас, қариндошлиқ, дўстлик қарор топарди.
Халифа ҳам жуда хурсанд бўлар эди бу ишдан.

Маҳмуд

Ўлма, вазир, фаросатинг ва ақлингга қойилман!

Майданий

Фақатгина, маликамиз кўнармикан?

Маҳмуд

Унайди.

Қарсак чалади. Мулоғим киради.

Сайёрани бунда чақир!

Мулоғим

Ҳўб бўлади, султоним.

Мулоғим чиқиб кетади.

М а ҳ м у д

Ҳа, Сайёра чиққан эмас ҳеч вақт менинг сўзимдан.

М а й м а н д и й

Қоратегин не дер экан? Ваъда берган эдингиз,
Қоратегин куёв бўлиш орзусида юрибди...

М а ҳ м у д

Эзарари йўқ, тушунади, тушунтириб қўямиз.
Бора-бора Ҳоразмнинг беги бўлса ёмонми?

М а й м а н д и й

Тушунарлик, улуғ султон.

Таманно билан Сайёра киради.

С а й ё р а

Хизмат, улуғ султоним?

М а ҳ м у д

Ҳоразмшоҳ сенга куёв бўлмоқчимиш, не дейсан?

С а й ё р а

(пича ўйланаб)

Ихтиёрим сенда, оға.

М а ҳ м у д

Балли, синглим, омон бўл!

Ҳоразмдай бой ўлканинг маликаси бўлишлик
Ёмон эмас... Ўзинг билан канизаклар, чўрилар,
Навкарлардан, соқчилардан кўпроқ олиб борасан...

С а й ё р а

Демак, гўзал Ҳоразмни қурол, яроғ, қўшинсиз,
Ҳийла билан олмоқчисиз... Мен розиман, оғажон.

Маҳмуд

Шундай жавоб беришингни билар эдим. Ахир, сен Султон Маҳмуд Ғазнавийнинг синглисисан, маликам! Майли, синглим, сенга жавоб. Тайёрлик кўр сафарга!

Сайёра

Хўб бўлади, оғажоним.

Маҳмуд

Тангри сенга ёр бўлсин!

Сайёра чиқиб кетади.

Қани, вазир, Маъмуншоҳга ҳадя, инъом тайёрланг,
Маликанинг молу мулки, совға-салом, сепини
Юз туяга, эллик филга, уч юз отга ортинглар!

Маймандий

Шоҳ Маъмунга аввал хабар қилсак яхши бўларди...

Маҳмуд

Маъмун менинг хоҳишимиға қарши бўла олурми?
Аксинча, у жон-жон дейди менга куёв бўлишга.
Ахир мени хафа қилмас хоҳишими радиб.
Бинобарин тайёргарлик кўраверинг, ўйланманг!

Маймандий

Хўб бўлади.

Маҳмуд

Хоразмни ювоштирасак, орқамиз
Мустаҳкамроқ бўлур. Сўнгра, бутун кучни Ҳиндистон
Томон ташлаш осон бўлур.

Маймандий

Худди шундай, султоним.

М а ҳ м у д

(кулиб)

Ўйлайманки, Хоразмшоҳ менга ҳурмат кўрсатиб,
Совғаларни икки ҳисса қилиб менга қайтарур...

М а й м а н д и й

(кулиб)

Битта ёмби ўнта ёмби бўлиб қайтиб келади.

М у л о з и м киради.

М у л о з и м

Улуғ султон, Хоразмдан Қоратегин келибди.

М а ҳ м у д

Дарҳол кирсин ҳузуримга!

М у л о з и м

Ҳўб бўлади, султоним.

М у л о з и м чиқиб кетади.

М а ҳ м у д

Ўз вақтида етиб келди. Жуда яхши! Жуда соз!

Қоратегин кириб таъзим қилади.

Қ о р а т е г и н

Улуғ султон, Хоразмдан сизга салом келтирдим.

М а ҳ м у д

Яхши. Гапир Хоразмнинг аҳволидан!

Қ о р а т е г и н

Хоразм
Жуда гуллаб, яшнаб кетган. Сув ичади Жайҳундан.

Боғларидан бол томади, серҳосилдир тупроғи.
Қасбу ҳунар, дәжқончилик ривож топган жуда ҳам.
Шаҳарлари, бозорлари жуда обод, савдода
Хоразмга тенг келурлик мамлакат оз жаҳонда.
Чунки улуғ савдо йўли Хоразмдан ўтади.
Бухородан, Самарқанддан, Ҳиндистондан, Хитойдан
Хоразмга савдогарлар келиб туарар пайдарпай.
Булғорларнинг юртидан ҳам, Кавказ, Миср, Юнондан
Хоразмга келадиган савдогарлар беҳисоб.

Маҳмуд

Туганмас бир кон десанг-чи!

Қоратегин

Худди шундай, сultonим!
Илму фанга кўп эътибор бермақдадир Маъмуншоҳ,
Саройига етти иқлим олимлари тўпланган.
Турли ёқдан келган шоир, рассом, хаттот ҳисобсиз.
Шоҳ Маъмуннинг хизматида созандалар, машшоқлар.
Аммо лекин олимларнинг жуда кўпи даҳрийдир,
Алалхусус, Абу Райҳон, Ибн Сино хавфлидир.
Берунийнинг фикрлари мутлақо зид қуръонга,
Дини ислом, шариатга хавф солмоқда Беруний.

Маҳмуд

Қандай қилиб, бундай бадкор, диндан қайтган олимни
Саройида сақламоқда Хоразмшоҳ!

Қоратегин

Чунки у

Ушаларга ён босади.

Маҳмуд

Нима дейди муллалар?

Қоратегин

Муллаларнинг Берунийни отиш учун ўқи йўқ!
Улар шоҳдан ранжиганлар, сиздан мадад кутади.
Сизни дуо қилмоқдалар мачитларда туну кун.

Сизга улар нусрат тилар шому саҳар худодан,
Муллаларнинг кўзи сизнинг йўлингизда, сultonим!

Маҳмуд

(ўйчан)

Шунақами?.. Ҳа, ҳа... Майли... Бу ёғини кўрамиз...
Абу Райҳон ҳақиқатан жуда катта олимми?

Маймандий

Жуда доно дейишади сұхбатида бўлганлар.
Ҳозир унга тенг келувчи олим йўқмиш жаҳонда.
Аммо шаккок, даҳрий эмиш, ўжар эмиш ўлгудай.

Маҳмуд

Агар менинг саройимга келтирилса Беруний,
Икки кунда мулла қилиб, ювошириб қўярдим.
Ҳа, Беруний, Ибн Сино каби машҳур олимлар
Фақат менинг саройимда бўлишлари керакдир.
Қоратегин, ё зар билан, ё зўр билан уларни
Саройимга келтирасан! Унамаса...

Қоратегин

Тушундим.

Маҳмуд

Қўлингдаги нима?

Қоратегин

Китоб, Берунийнинг китоби.
Ола кел деб, кўп илтимос қилиб эди шаҳзода.

Маҳмуд

(китобни қўлига олиб варақлаб кўради)

Ҳа, ҳа, жуда қизиқ китоб бўлса керак бу китоб...

Масъуд киради.

Масъуд

Қоратегин, қани китоб?!

Маҳмуд

(китобни *Масъудга узатиб*)

Мана китоб, шаҳзода.

Масъуд

(китобни олиб кўзига суртади, ўпади)

«Ал-боқия»! Раҳмат сенга, Қоратегин, минг раҳмат!
«Ал-боқия»! «Ал-боқия»! Устозимнинг китоби!

(Китобни варақлаганича, чиқиб кетади.)

Маҳмуд

Ҳа, шаҳзода бошқа йўлдан бормоқдалар... Минг афсус...
Яна қандай хабарлар бор?

Қоратегин

Ҳа, яқинда Халифа
Шоҳ Маъмунга сарпо йўллаб, «Дини ислом безаги»,
«Давлатпаноҳ» деган олий унвон берди.

Маҳмуд

(дарғазаб)

О, маккор!
Тили бошқа, дили бошқа субути йўқ **Халифа!**
Бу унвонлар фақат менинг учунгина муносиб
Унвон эди! Уни менинг рақибимга берибди!

Майдандий

Ҳафа бўлманг, улуг султон! Ҳа, бўлажак куёвнинг
Мартабаси ошган бўлса нур устига аъло нур.

К о р а т е г и н

(ҳайрон)

Қандай күёв?

М а ҳ м у д

Сайёранни шоҳ Маъмунга бераман.

К о р а т е г и н

(ҳаяжонда)

Ахир, султон!

М а ҳ м у д

Үпкангни бос! Қароримиз шунақа!

Шоҳ Маъмунга бориб айтгил тезда совчи юборсин!

Қолган гапни Сайёранинг ўзи сенга айтади.

Шу ерда кут, ҳозир келур. Қани, вазир, биз кетдик.

Маҳмуд билан Маймандий чиқиб кетишиади.

К о р а т е г и н

(дарғазаб)

Бу қандай гап?! Нега султон ваъдасини бузади?

Э, худойим, нега бунча ташвиш солдинг бошимга!

Нима гуноҳ қилган эдим? Кечир осий бандангни!

Бу даргоҳдан бошқа юрга кетайинми бош олиб?..

Йўқ, йўқ!.. Маҳмуд қайга бормай ахтаради, топади...

Қўли узун, ҳамма ерда жосуслари муҳайё!

Тақдирга тан беришлиқдан бошқа чора қолмади...

С а й ё р а киради.

С а й ё р а

Ҳа, баҳодир, Қоратегин, хуш келибсан!

Қоратегин

Хушвақт бўл...

Сайёра

(кулиб)

Хушхабарни эшилдингми?

Қоратегин

Минг афуски, эшилдим.

Сайёра

Хафа бўлма, оқибати хайрлиди бу ишнинг.
Бир кун әмас, бир кун бориб Хоразмшоҳ ўлади.
Шунда унинг тожи тахти ўзимизга қолади.

Қоратегин

Хоразмшоҳ ўлгунича мен ҳам адo бўламан.
Шоҳ қўйнига кирганингда раشك ўтида ёнаман.

Сайёра

(кулиб)

Кўрқма, сенга муҳаббатнинг сарқити ҳам етади.

Қоратегин

О, айёрсан!

Сайёра

Айёрликни ўзларидан ўргандим.

Қоратегин

Тилинг заҳар!

Сайёра

Кўрқма, сенга заҳаримни солмайман,
Бу заҳарнинг эгаси бор.

Қоратегин

Қайдам...

Сайёра

Ишон сўзимга!

Қоратегин

Ким билади, сўзларингга ҳеч ишонгим келмайди.

Сайёра

Ҳаддан ошма, мен кўкдаги Сайёраман! Сен эса
Ерда юрган ҳашаротсан!

Қоратегин

Кечир мени, маликам.

Сайёра

Хоразмшоҳ саройида мендан улуғ зот бўлмас.
Шоҳ амридан менинг амрим устун бўлур! Ахир мен
Султон Маҳмуд Газнавийнинг ҳамшираси бўламан!
Амин бўлгил, севгимизга ҳеч ким ҳалал беролмас,
Агарда шоҳ эрим бўлса, сен севғилим бўласан.

Қоратегин

О, бу гаплар қанча оғир...

Сайёра

Бундан оғир гаплар бор.

Қоратегин

Ё раббий!

Сайёра

Ҳа, шуни яхши билиб қўйки, мен билган
Эркакларнинг орасида сен тўртинчи эрурсан.

Қ о р а т е г и н

(бўғилиб)

Айт, улар ким??

С а й ё р а

(кулиб)

Улар ғулом, қул эдилар.

Қ о р а т е г и н

Қаерда?!

С а й ё р а

Қора ерда.

Қ о р а т е г и н

Э, худойим!

С а й ё р а

Бир неча кун майшат,
Ишратдан сўнг бошларини олдирганман...

Қ о р а т е г и н

Е раббий!

С а й ё р а

(кулиб)

Қандоқ қилай, эркакларни жуда яхши кўраман,
Хўш, энди ҳам мендан кўнгил узмайсанми?

Қ о р а т е г и н

Ҳеч қачон!

Утган ишга салавот, деб тақдиримга тан бериб,
Сенинг қулинг бўлмоқчиман, сенсиз менга ҳаёт йўқ!

Сайёра

Хоразмшоҳ саройини эгаллаймиз қўшинсиз.
Бизга содиқ бўлмаганлар ҳайдалади саройдан.
Хоразмшоҳ саройида ёғизламиб қолмаслик
Учун ғулом, маҳрамлардан кўпроқ олиб кетамиз.
Тушундингми?

Қоратегин

Ҳа, маликам, хизматингга тайёрман.

Маҳмуд билан Маймандий кирадилар.

Маҳмуд

Ҳўш, сўзлашиб бўлдингларми?

Сайёра

Қоратегин тұшунди.

Маҳмуд

Үндай бўйса Хоразмга шу бугуноқ жўнайсан.
Шоҳ Маъмүнга, муллаларға биздан қуюқ салом айт!
Мўллаларға совға-салом ола боргил!

Қоратегин

Тушундим.

Қоратегин таъзим билан чиқиб кетади

Маҳмуд

Берунийни саройимга көлтиришни буюрдим,
Қоратегин улдасидан чиқолмаса бу ишнинг,
Сен илож қил, йўлини топ, Берунийни қўлга ол!

Сайёра

Улуғ султон, сенинг амринг вожиб эрур мен учун.

Парда

УЧИНЧИ ПАРДА

БИРИНЧИ КУРИНИШ

Орадан бир қанча вақт ўтган. Берунийнинг ҳовалиси. Ез пайти, гулзорда гуллар чаман бўлиб очилиб ётиди. Ўртада шоҳсупа, бир чеккада каравот, мажнунтоллар билан ўралган мармар ҳовуз. Су-пода ипак гиламлар, шоҳи кўрпачалар тўшалган, ўртасида хонтахта. Хонтахта устида ҳар хил китоблар, қўл ёзмалар, қофоз, сиёҳдонлар, глобус ва ҳар хил илмий асбоблар. Тонг оқариб келмоқда. Шамдонда шам ёниқ. Ҳеч ким йўқ. Бир оздан сўнг бир даста гул кўтариб Гулсанам киради. У ёқ-бу ёққа қарайди, гулларни гулдонга қўяди.

Гулсанам

Тонг бўзариб келмоқдадир... Сабо эсар чаманда
Табиатни уйқусидан уйғотай деб... Беруний
Бу кеча ҳам ухламаган чоғи... Мана, шам ёниқ...

(Шамни туфлаб ўчиради.)

О, бу олим уйқу нима, роҳат нима билмайди.
Боғ айланиб юрса керак хаёл суринб, ўй ўйлаб...
О, жонгинам Абу Райхон, бир кун сени кўрмасам
Тоқатим тоқ бўлур... Аммо кўринишдан қўрқаман...
Оловга дуч келгандайман сени кўрсам, азизим...
Васлинг олов, ҳижронинг ўт, иккиси ҳам ёндиур!..
Бу дунёга ёниш учун кёлсам керак, эҳтимол...

(Гулдондаги гулларни ҳиллаб.)

Қўз ёшларим шабнам бўлиб япроқларда ялтиранг!
Лабларимдан дарак беринг ёрга, қизил ғунчалар.
О, нарғислар, сизни кўриб эсласин ёр кўзимни...

Сочларимнинг ҳиди бўлиб тарқанграйхон ҳидлари...
Шоирларга, олимларга тонгда илҳом келармиш,
Халал бермай илҳомига... Азоб чекай ҳажрида...

Гулсанам чиқиб кетади. Бир оздан сўнг, хаёлчан, аста босиб,
бог томондан Беруний келади. Кўзлари гулдандаги гулларга
тушиб, ҳаяжонланади.

Беруний

Яна ўша! Яна келмиш! О, Гулсанам, Гулсанам!
Ҳар келганда ҳузуримга қуёш бўлиб келасан,
Гўё олам нурга тўлар сен туфайли ярқираб,
Ҳаётимнинг қувончисан, жаҳондаги таянчим...

(Гулларга қараб.)

Гулни қўйиб ўзи кетмиш. Ҳа, одати шунаقا...
Гул орқали сўзлашгандай бўлади у мен билан...
Гул япроғи ёноқлари... Лабларидир ғунчалар...
Райхон ҳиди өслатади соchlарининг ҳидини...
Севгисини изҳор әтиб гул келтирап ҳар куни..
Кундан-кунга ёнса керак... Мен ҳам ҳар кун ёнаман.
Ишқ ўтининг азобига бардош бериш мушкулдири...
Бир ҳисобдан Гулсанамнинг бўлгани ҳам яхшидири,
Барча ташвиш унутилар агар уни өсласам.
Илҳом берар далда берар менга унинг хаёли,
Олам гўзақ кўринади Гулсанамни ўйласам...

Бир қўлида тугун, бир қўлида хурмача кўтариб, Бибисора
киради. Берунийга таъзим қиласди.

Беруний

Келинг, келинг, Бибисора!

Бибисора

Сизга қатиқ келтирдим.

Беруний

О, жуда соэ! Раҳмат! Қатиқ минг бир дардга даводир!

(Қатиқни олиб хонтахта устига қўяди.)

Б и б и с о р а

Мана, кийимларингизни ювиб келдим...

(Кийимларни каравотга қўяди.)

Б е р у н и й

Минг раҳмат!

Хўш, ўғилча қалай?

Б и б и с о р а

Тузук... иситмаси босилди...

Ибн Сино берган дори жуда яхши эм бўлди.

Б е р у н и й

Ундаи бўлса ўғилчангиз тез тузалиб кетади.

Ибн Сино улуғ ҳаким, табобатда тенги йўқ!

У табиблар табибию ҳакимларнинг ҳакими!

Б и б и с о р а

Умрлари узоқ бўлсин ҳаким Ибн Синонинг,
Ёлғизгина фарзандимни ҳалокатдан қутқарди.

Б е р у н и й

(Бибисорага қанд-қурс, ҳолва беради)

Олиб бориб ўғлингизга беринг мана буларни.

Б и б и с о р а

(ҳолваларни олиб)

Раҳмат, устоз. Бахтимиэга омон бўлинг! Минг яшанг!

(Таъзим билан чиқиб кетади.)

Бир даста ёқут, лаълиларни кўтариб Жаъфар киради.

Жаъфар

(ёқут, лаълиларни Берунийга бериб)

Мана, устоз, тажрибанинг натижаси.

Беруний

Хўш, қалай?

(Лаълиларни кўздан кечириб.)

О, ажойиб! Очилибди! Тозарибди! Бир қаранг!
Худди ўзим мўлжал қилган натижани берибди.

Жаъфар

Жуда аъло бўлиб чиқди.

Беруний

Бир ҳуснига ўн ҳусн
Қўшилибди. Заргар биздан жуда мамнун бўлади.
Демак, ўтда қиздирилса ҳақиқ, лаъли, ёқутга
Ранг қўшилур!.. Гўзаллашур, равшанлашур жилоси!
Қаранг, тиниқ, шаффоғ! Тоза!

Жаъфар

Худди анор донаси!

Заргар киради.

Заргар

Салом, устоз! Бевақт келиб, халал берганим йўқми?

Беруний

Салом! Салом! Келинг, заргар. Ўз вақтида келдингиэ,
Мана, кўринг, бизга берган ёқут, лаълиларингиз.

(Заргарга ёқутларни беради.)

З а р г а р

(Еқутларни кўздан кечириб ҳаяжонланади.)

Ё, алҳазар! Булар ўша лаълиларми?

Б е р у н и й

Ҳа, ўша.

З а р г а р

Тамомила ўзгарибди! Бу мўъжиза!

Ж а ъ ф а р

Мўъжиза!

Б е р у н и й

Ўн баробар ошиб кетди лаълиларнинг баҳоси.

З а р г а р

Шу бугуноқ жазманларга ҳаммасини пуллайман.

Б е р у н и й

(кулиб)

Фойдасига тенг шерикмиз!

З а р г а р

Жоним билан! Жуда соз!

Б е р у н и й

Ҳазил, тақсир. Бу лаълилар фанга хизмат қилишди,
Шу ўзи бас! Қолган фойда ўзингизга буюрсин!

З а р г а р

Раҳмат, устоз, миннатдорман!

Беруний

(кулиб)

Сизга — бойлик, бизга — фан!
Қимматбаҳо тошлар билан, олтин билан ишим йўқ.
Булар фақат тажрибага керак бўлган буюмлар.
Алкиндиининг китобини қайта-қайта ўқидим,
Унда қимматбаҳо тошлар таърифланур мукаммал.

Заргар

(Лаълиларни халтага солади. Бўлак халтадан янги
лаълиларни олиб, Берунийнинг олдига қўяди.)

Хўб, мана бу ёқутлар ҳам фанга хизмат қилишсин.

Жаъфар

Ҳо, тақсирим мазахўрак бўлиб қолди, чамаси!

Заргар

Йўқ, йўқ! Мақсадим, ҳазрати Берунийга ёрдам кўргазиш
ва фанга холис хизмат қилишдир.

Беруний

Баракалло! (Янги лаълиларни кўздан кечириб.) Бу лаъ-
лилар ҳам Бадаҳшондан, Барзганж конидан қазиб олин-
ган.

Заргар

Мавлоно, тошларни ҳам китоб қилиб ўқиёсиз-а!

Беруний

Касбимиз шунаقا.

Заргар

Менга рухсат, устоз! Мен борай, яна келарман.

Беруний

Майли, тажрибалардан сўнг буюмларингизни олиб кетарсиз.

Заргар чиқиб кетади. Худойберди киради.

Худойберди

Салом, устоз!

Беруний

Салом. Кел, Худойберди. Устозинг қалай?

Худойберди

Устозим Ибн Сино ҳам сизга ўхшаб илмий ишлар, тадқиқотлар билан банд, тажриба устига тажриба.

Беруний

Ҳа, илмий ҳақиқат тажрибалар, мушоҳадалар, кузатувлар натижасидагина аниқланади. Ҳўш, шаҳарда нима гаплар?

Худойберди

Шаҳарда ёмон гаплар, хунук хабарлар кўп. Шаҳар олаговур. Шаҳар кўчаларини Газна томондан келган аллақандай қаландарлар, дарвишлар, савдогарлар босиб кетди. Юриш-туришлари, қарашлари шубҳали.

Беруний

Ҳа, булар султон Маҳмуднинг жосуслари, айғоқчилари. Э, тавба! Шоҳ нега бунча мудрайди?

Жаъфар

Ҳар ҳолда күёв-да, қайнатасидан андиша қиласди.

Беруний

(ғамгин)

Хоразмнинг шўри! Ҳалқнинг шўри!..

Ибн Ироқ, Масиҳий, Дабир, Ибн Синолар
киришади.

Ибн Ироқ

Салом, Абу Райҳон!

• Беруний

Салом, ўстоз! Салом, дўстлар! Ибн Сино, ишларингиз
қалай?

Ибн Сино

Қора безгакнинг давосини топдим. Чакки әмас. Аммо
биз илмий ишлар билан машғулмизу бошқалар бизнинг
пайимиизни қирқиши пайида юрибдилар.

Беруний

Э, тангрим, замон қачон тинчийдию олимлар қачон ос-
тишта ижод билан шуғуллана олурлар!

Ибн Сино

Султон Маҳмудлар, жоҳид муллалар, мутаассиблар бор
экан, замон тинчимайди. Назаримда, яна олдимизда хав-
фу хатарлар, қувғинлар, жаҳонгашталиклар кўндаланг бў-
либ тургандай. Қолган умримиз ҳам қоч-қоч билан, сарсо-
ну саргардонликда ўтадиганга ўхшайди.

Ибн Ироқ

Бугун бомдодда, оломон ҳузурида Шайхулислом яна ваъз
айти. Бутун қаҳрини сизларга қаратди, бутун заҳрини
сизларга сочди. Шу даҳрийлар, шу диндан қайтганилар
туфайли замон бузилмоқда, Хоразм инқирозга йўл тут-
моқда. Агар бу осийликни бартараф қиласак, уларни
муқаддас Хоразм тупроғидан ҳайдамасак, охиё замон бў-

лади, деб қичқирди. Сизларни дуойи бад қилмоқчи. Улар билан ҳисоблашишга тўғри келади, азизлар.

Беруний

Ҳеч қачон!

Масиҳий

Абу Райҳон, вазият нозик, замон қалқиб турибди. Агарда уларга ён бермасак, ўзимиз ҳам ҳалок бўлурмиз, илмимиз ҳам ҳалок бўлгуси!

Беруний

Қўрқитманг, устоз! Ўзимиз ҳалок бўлсак ҳам фанимиз ҳалок бўлмайди! Чунки китобларимиз, асарларимиз халқнинг қўлида!

Ибн Ироқ

Ўжарлик қилманг, Абу Райҳон, илтимос қилурмиз. Шайхулислом билан муросага келинг, унга узр айтинг, тавба қилинг.

Беруний

Мұҳтарам устоз, агар мен тавба қылсам, фақат тангригагина тавба қилурман! Жоҳилларга тавба қилмоқ ҳам уят, ҳам хато, ҳам гуноҳ! Жоҳилларга ён бериш фанга, халққа, келажакка хиёнат қилиш бўлур эди!

Ибн Сино

Устозлар, Беруний ҳақ әрур! Фан билан жаҳолат ўт билан сув! Бир-бирига қўшилмайди, бир-бирига ён беролмайди! Тавбаю тазарру билан масала ҳал бўлмайди! Фан билан жаҳолатнинг кураши абадий!

Беруний

Фан йўли — қуёш йўли! Вақт ўтган сайин қуёш юксала бориб зулматни енгади! Бу ҳақиқат қуёшдай равшан! Келажакка ишонурмиз, келажак ёрқин!

Кўчадан чопиб ўтган отларнинг туёқ товушлари эшитилади.

Ибн Сино

Яна суворийлар!

Беруний

Ха, шу кечаю қундузда суворийлар кўпайиб қолди. Шаҳарнинг у бошидан бу бошига қараб чопишгани чопишган. Бу кеча ҳам тинишгани йўқ. Нимани ахтарадилар! Кимни ахтарадилар?

Дабир

Шоҳга қарши, деб бир қанча аслзодалар, лашкарбошлилар қўлга олиниб, зиндонга солиндила, молу мулклари мусодара қилинди...

Беруний

Шоҳга нима бўлди? Нега бундай қиласди? Нега ўз оёғига ўзи болта уради? Бемаслаҳат...

Дабир

Бу ерда шоҳимиз Маъмундан кўра малика Сайёранинг, элчи Қоратегиннинг саъии ҳаракати кўпроқ. Ахир ҳозир саройда шоҳ әмас, ўшалар ҳукмрон. Навбат менга ҳам келмаса деб қўрқаман...

Кўчадан яна от туёқларининг овози эшитилади, овозлар дарвоза ёнига келиб тинади. Бир оздан сўнг Қоратегин билан Сополтегин кириб келишади.

Қоратегин

О, жамоат жам-ку! Нима, сиз ҳам шоҳга қарши фитна уюштиргани тўпландингизми?!

Беруний

Нафасингиз бунча совуқ, жаноби элчи!

Қоратегин

(кулиб)

Ҳазил!

Беруний

Ҳазилнинг ҳам энг қўполи!

Ибн Сино

Мол эгасига ўхшамаса, ҳаром ўлади дейдилар!

Қоратегин

Кулманг, Ибн Сино, кейин йиглаб юрасиз! Сизда ишимиз бор!

Беруний

Бизнинг сизда ишимиз йўқ! Ахир мен сизни уйимга таклиф қилганим йўқ эди-ку!

Қоратегин

(кулиб)

Биз камтар одамлармиз, таклифсиз ҳам келаверамиз. Биз учун яъни, султон Маҳмуд Газнавийнинг әлчилари учун ҳамма әшик ҳам очиқ!

Беруний

Бу ер Ҳораэм! Газна әмас! Султон Маҳмуднинг ҳукми бу ерда ўтмайди!

Қоратегин

(кулиб)

Ҳораэм — султон Маҳмуд күёвнинг мамлакати. Күёв қайнатанинг хоҳишига қарши бўла оладими? Сиз билан Ибн Синода муҳим гапимиз бор! Бошқаларга жавоб!

Б е р у н и й

Булар гапга халал бермайдилар.

Қ о р а т е г и н

Гапимиз махфий. Қолганларга жавоб! Жаноби Дабир, сизнинг хатти-ҳаракатларингиз бизга кўп ҳам мақбул эмас!

Д а б и р

Биламан, жаноби элчи, таъкидлашга ҳожат йўқ.

Дабир, Ибн Ироқ, Масиҳий чиқиб кетишиади.
Жаъфар, Ҳудойберди ҳам ичкарига кириб кетишиади.

Б е р у н и й

Хўш, яна ўша эски гапми?

Қ о р а т е г и н

Ха, ўша гап.

Б е р у н и й

(дарғазаб)

Ахир неча маротаба айтишим керак! Газнага, султон Маҳмуд саройига бормайман! Бормайман! Тушунасизми?

Қ о р а т е г и н

Биз-ку, тушунамиз-а, аммо султон Маҳмуд тушунмай ётибди. Султон Маҳмуд сизларни ўз саройида кўрмагунча тинчмайди, бизга ҳам тинчлик бермайди. Агарда, қай-сарлик қилмасдан Газнага борсаларингиз, султон сизларга алоҳида қасрлар қуриб беради, остоңангизни тилладан қилиб беради.

И б н С и н о

Султоннинг қасрлари ўзларига буюрсин. Биз унақа ҳашаматли қасрларда яшаб ўрганмаганимиз.

Қоратегин

Мана, султон бу сафар атайлаб сарбозлар билан бирга Сополтегинни юборибдилар. Чор-ночор Ғазнага боришга тўғри келади.

Ибн Сино

Бормаймиз! Боролмаймиз! Вақтимиз йўқ, ишимиз кўп!

Сополтегин

Султоннинг ғазаби билан ўйнашавериш яхши эмас!

Беруний

Биз қул эмасмиэ! Ихтиёр ўзимиэда!

Сополтегин

(кулиб)

Хозирча...

Беруний

(дарғазаб)

Бу нима деганингиз?!

Сополтегин

Яқин кунларда шундай ҳодисалар юз берадики...

Қоратегин

(сўзини бўлиб)

Бу ҳақда кейин! Демак, бу сафар ҳам Ғазнага боришдан бош тортасиз, шундайми?

Беруний

Шуни яхши билиб қўйинг, ватандан воз кечмайман!
Хоразмни — ўз юртимни тарқ әтмайман ҳеч қачон!

Хоразмни алишмайман Газнага ҳеч, ҳаттоки,
Газна жаннат бўлганда ҳам! Ахир неча-неча йил
Қувғинликда, сарсонликда юриб, энди юртимга
Етишганда яна уни қандай ташлаб кетаман?!

Шу тупроқда туғилғанман! Болалигим, ёшлигим
Шу тупроқда ўтган, ҳа, ҳа! Шу тупроқда онамнинг,
Аждодимнинг хоки ётур, бу ер менга муқаддас!
Билиб қўйинг, ихтиёrim билан юртдан кетмайман!
Ким бўлмасин, ўз юртини ихтиёрий равишида
Ташлаб кетса у хоиндир! У оқпадар! У малъун!

Қоратегин

Ундай бўлса сизларни зўрлик билан олиб кетишга мажбурмиз! Ташқарида сарбозлар турибди.

Шу пайт ҳовлига Қоплон ботир кириб келади.

Қоплон ботир

Салом, устоз! Салом, Ибн Сино! Салом, элчи жаноблари!
Ҳо, султон Маҳмуд Газнавийнинг машҳур саркардаси
Сополтегин, сиз ҳам шу ердамисиз! Ҳуш келибсиз! Бу,
ташқарида турган сарбозлар қанақа сарбозлар! Улар
кимни кутиб туришибди? Тинчликми?

Сополтегин

Нима ишинг бор?! Сени бу ерга ким чақирди?!

Қоплон ботир

Хоразмда бақириб гаплашмайдилар. Бақириб гаплашган одамнинг кекирдагини сугуриб оладилар!

Сополтегин

(дарғазаб, қиличини ғилофидан сүғуриб)

Нима, сени бу ерга ажал ҳайдаб келдими?!

Қоплон ботир

Қиличинги ғилофига солиб қўй! Бу даргоҳда, буюк ва табаррук одамларнинг ҳузурида қилич яланғочлаш гуноҳ!

Агар қўлинг қичиб турган бўлса, ташқарига чиқиб қиличбозлик қиласли! Мен ҳам Ҳоразмнинг уста қиличбозларидан бири бўламан!

С о п о л т е г и н

(ҳайрон, қиличинц ғилофига солади)

Кимсан?

Қ о п л о н б о т یر

Асли дәхқон. Вақти келганда аскарлик ҳам қилганман. Юртни босқинчилардан, келгиндилардан қўриқлаганман. Ҳозир эса миробман, мавлоно Абу Райҳон Муҳаммад иби Аҳмад Берунийнинг бу соҳадаги ишларида ёрдамчилариман. Тушунарлимис?

С о п о л т е г и н

Тушунарли!

Қ о п л о н б о т ир

Ундаи бўлса, вақт ғанимат, бу ердан тезроқ жўнаб қолинглар! Мен биламан устознинг ишлари кўп, вақти оз! Бош қашишга ҳам қўллари тегмайди. Биламиз, сиз Берунийни Газнага олиб кетгали келгансиз. Аммо Беруний бормайди! Ўз ватанини иктиёрий равишда тарқ этмайди. Биз ҳам Берунийни ҳеч кимга бермаймиз! Беруний битта! Елғиз! Ўзимизга керак! Агар Беруний иккита бўлганда эҳтимол, биттасини султон Маҳмудга қарз бериб турган бўлардик, ўшанда ҳам ўйлашиб қўрардик. Эшикда ғазабланган оломон турибди. Ҳа, ҳо! (Ташқаридан оломоннинг шовқини эшитилади.) Эшитдингизми? Элчи жаноблари, илтимос, яхшиликча жўнаб қолинглар, беҳуда қон тўкилмасин!

Қ о р а т е г и н

(ғазабли)

Дарди бедаво! Кетдик! Ҳайр, Абу Райҳон, кўришгунча!

Қоратегин ва Сополтегин шитоб билан чиқиб
кетишади.

Беруний

(ҳаяжонда)

Раҳмат сизга, Қоплон ботир, бизни бир балодан қутқар-
дингиз!

Ибн Сино

Агар сиз келиб, ёрдам бермасангиз аҳволимиз нима бўлур
эди, худо билади.

Қоплон ботир

Таажжублайнанг, устоз! Ҳамма нарсадан хабардормиз!
Ҳар гўшада, ҳар ерда бизнинг ҳам кўз-қулоқларимиз, яъни
айғоқчиларимиз бор. Улар бизни ҳамма воқеадан огоҳлан-
тириб турадилар. Султон Маҳмуднинг ёвуз ниятлари биз-
га маълум Сополтегиннинг нима мақсад билан бу ерга
келганини ҳам билар эдик. Пайига тушдик, мана, оқибат-
да, ўз вақтида пайини қирқдик.

Беруний

Тасанно, раҳмат, Қоплон ботир! Бу яхшилигингиизни ўла-
ўлгунча унутмаймиз. Ҳақиқатан ҳам ташқарида оломон
борми?

Қоплон ботир

Ҳа, устоз! Оломон, ҳалқ безовта! Беклардан, аслзода-
лардан норози. Улар, сиз тузиб берган сув тақсимоти
қоидаларини яна бузмоқдалар. Улар дехқонларга навбат
бермай ётибди. Дехқонларнинг ерлари қовжираб, әкинла-
ри қуриб кетмоқда. Ахир, эрта баҳорда совуқда муздай
сув кечиб, лойга қорилиб, оғир, машаққатли қазув ишла-
рини бажарган ўшалар эди! Мана, энди роҳатини боёнлар
кўрмоқдалар. Ҳалқ норози! Ҳалқbekларга қарши исён
кўтармоқчи.

Б е р у н и й

Азиз Қоплон ботир, биласиз-ку, ҳозир исённинг вақти әмас! Ҳозирги исён ташқи ёвга ёрдам бериши мумкин. Ҳозир бир ёқадан бош чиқариб, кучни бир ерга тўплаб туриб, ташқи душманга қарши курашга ҳозирланмоқ лозим.

Қ о п л о н б о т и р

Устоз, биз ҳам шу фикрдамиз. Аммо ҳалқнинг оғир вазиятини тушуниш, ҳалқнинг ҳаққоний талабларига оди-лона жавоб бермоқ, қутурган бекларнинг, аслзодаларнинг жиловини пича тортиб қўймоқ зарур. Юрт тинчимаса, мамлакат тинчимайди. Беклар, амалдорлар, аслзодалар мансаб, имтиёз, бойлик талашиб бир-бирини бўғиб ўлдиришга тайёр!

Б е р у н и й

О, бу беклар, аслзодалар ҳалқнинг бошига битган бало! Мен шу бугуноқ шоҳ билан гаплашаман, сув ҳақидаги тартиб-қоидани бузгандар қаттиқ жазога мустаҳзиқ қилинурлар!

Қ о п л о н б о т и р

Азиз устоз, шоҳ ўзи билан ўзи овора. Ҳозир шоҳ қафасга тушган айиққа ўхшаб қолган. Кейин, ҳалқда бир мақол бор, сув сойга оқар, бой бойга боқар. Қарғанинг кўзини қарға чўқимайди, дейдилар.

И б н С и н о

Гапингиз тўғри, ботир. Аммо вазиятни шоҳга тушунти-ришга уриниб кўрамиз, зора тушунса.

Қ о п л о н б о т и р

Майли, ҳалқ, бечора ҳалқ яна пича сабр қилади. Аммо, устоз, биласиз-ку, сабрнинг ҳам чегараси бўлади.

Б е р у н и й

Шубҳасиз.

Қоплон ботир

Бўлмаса, менга рухсат, устоз. Мен бориб халқни тинчичай. Зора ишимиз ўнгидан келса. (Чиқиб кетади.)

Беруний

Қоплон ботир жуда ҳам ҳақ! Сўзларининг жони бор...
Ҳа, азизим, ҳамма ерда шу можаро, шу ташвиш.
Қайга борманг, шафқат қилмай золим әзар мазлумни,
Ҳаётдаги барча ташвиш, барча жафо, оғирлик,
Келиб-келиб бечора халқ гарданига тушади...
Ҳа, азизим, йўлимизни яна туман қоплади.
Назаримда, осойишта яшаш учун бизларга
Шу поёнсиз дунёда ҳам бир парча ер топилмас...
Қайга борманг, яна ўша золимлару жоҳиллар,
Илму фаннинг душманлари, қўли қонга белангган
Юртбузарлар, босқинчилар, таловчилар, фотиҳлар!..

Ибн Сино

Ҳа, азизим, умр қисқа, қиладиган ишлар кўп,
Ишлар чала қолмасин, деб мен ҳам ташвиш тортаман.
Хайрли иш қиласман, деб Бухородан қувилдим,
Эндиликда Хоразмдан қувилдаман, чамаси...
Ҳўш, қаёққа? Бошимизни қайга олиб кетами?
Тоғларгами? Саҳрогами? Үрмонгами?.. Қаёққа?!.
Э, худойим, нега бизни зулму зулмат кучайган,
Ҳақсизликлар хуруж қилган бир замонда яратдинг?!

Беруний

Майли, дўстим, замонанинг зарбасига чидайлик,
Сабру тоқат, чидам, меҳнат ҳамроҳ бўлсин биз билан.
Ахир бир кун ёруғ кунлар бўлади-ку жаҳонда!
Ахир бир кун ҳақ-ҳақиқат чиқади-ку юзага!
Ахир инсон мавжудотнинг, табиатнинг тожи-ку.
Ахир бир кун енгади-ку ҳақсизликни, зулматни
Инсондаги ақлу-идрок, инсондаги фаросат!
Бир кун келиб инсонларча яшайди-ку инсонлар!
Ҳа, ўшанда фан нуридан баҳра олиб барча эл,
Иzzat-икром кўргусидир донишмандлар, олимлар.
Ахир, бизни йўқлайдиган, ёқлайдиган замонлар

Бир кун эмас, бир кун келиб қолса агар ажабмас...
Ҳа, умримиз, ҳәётимиз бизникимас, халқники...
Ҳа, халқ учун ва фан учун ўлимга ҳам тайёрмиз!..

Гулсанам киради, Ибн Синони кўриб, бери келишга
ботинолмай, узоқда тўхтайди. Ибн Сино уни кўриб,
кетишга ҳозирланади.

Ибн Сино

Ҳуб бўлмаса, мен борайин, бир иш бошлаб қўйгандим,
Мени кутиб ўтиришган бўлса керак шогирдлар.

Беруний

Майли боринг, азиз дўстим, тангри сизга ёр бўлсин!

Ибн Сино чиқиб кетади. Гулсанам Берунийга яқинлашади.

Гулсанам

Кечирасиз...

Беруний

Кел, Гулсанам.

Гулсанам

Сизни йўқлар малика...

Беруний

Малика? Ҳуш, маликанинг менда нима иши бор?

Гулсанам

Билолмадим... Ўзи айтар... Зарур иши бор эмиш...

Беруний

Таажжуб... Ҳа, эрта билан ушбу атиргулларни
Сен келтириб қўйганимидинг?

Гулсанам

(ўпкалаb)

Билиб туриб сўрайсиз...

Беруний

Кечир мени.

Гулсанам

Нега менга бунча азоб берасиз?
Биласиз-ку, сизни... сизни...

Беруний

Тушунаман, азизим.

Гулсанам

Агар мени севмасангиз, қийнамасдан...

Беруний

Севаман!
Йўқ, Гулсанам, йўқ, азизим, шубҳа қилма севгимга!
Ҳар кўрганда юрагимга ларза тушар, ўт тушар,
Муҳаббатнинг гулханида қовриламан, ёнаман.
Кечалари сенга аatab ишқий ғазал тўқийман...
Ионон, сенсиз ҳаёт менга зулмат бўлиб кўринур,
Қуёш бўлиб ёритади уни сенинг жамолинг.
Кеча-кундуз ҳамроҳ бўлур менга ширин хаёлинг.
Қайга борсам сездирмасдан қаторимда юрасан,
Ишлаганда далда бериб ҳузуримда турасан...

Гулсанам

Сизсиз менга ҳаёт йўқдир, битди сабру тоқатим.
Энди ҳижрон азобига бардош бера олмайман!
Васлингидан маҳрум әтманг, ёнингизда бўлайин...

Б е р у н и й

Йўқ, азизим, тақдирингни тақдиримга боғлама!
Қил устида турган каби доим менинг тақдирим.
Бугун борман, эртага йўқ, хавф остида ҳётим.
Жоним, бугун бу ердаман, аммо, эртага
Қаерларда бўлишимни билолмайман ўзим ҳам...
Ўз бошимни қўриқлашга қурбим етмас, шу ҳолда,
Сени қандоқ қўриқлайман балолардан, азизим!
Йўқ, сен яша фориғ бўлиб ташвишлардан, хавфлардан.

Г у л с а н а м

Бутун жаҳон ташвиш солур сизсиз менинг бошимга,
Сиздан жудо бўлишиликдан катта хавф йўқ мен учун.

Б е р у н и й

Ҳали ёшсан, маъсумасан, гулдай, нурдай покиза.
Ҳеч шубҳасиз, келажакда ўз баҳтингни топасан.

Г у л с а н а м

Сизсиз менга баҳт не керак? Менинг баҳтим фақат сиз...

Б е р у н и й

Тақдирингни тақдиримга боғламагил, азизим,
Қүёш каби узоқда юр, баҳра олай нурингдан!..

Г у л с а н а м

Мен чарчадим.. Мен хастаман... Юрагимда ўт ёнур...
Бу кетища кўпга бормай кул бўламан, азизим...
Саройдаги можаролар жонга тегди... Даҳшатдан
Кўзларимга уйқу келмас узоқ тунлар... Жонгинам,
Юринг! Юринг! Бу ерлардан узоқларга кетайлик,
Азоблардан қутулайлик осойишта жой топиб...

Б е р у н и й

Бу дунёда осойишта жой ахтарма — топилмас!
Инсон тирик әканми, бас, у қаерда бўлмасин,

Уни азоб-уқубатлар қуршаб олур доимо,
Осойишта жой ахтарма, фойдаси йўқ, топилмас!..

Гулсанам

(гамгин)

Борасизми?..

Беруний

(паришон)

А?.. Қаёққа?..

Гулсанам

Маликанинг олдига..

Беруний

Ҳа, малика... Ҳа, бораман.

Гулсанам

Маликадан хавфим бор.

Беруний

Нега?

Гулсанам

Қайдам... Аллақандай шубҳалар бор дилимда...

Беруний

Юр! Билайлик, маликанинг қандай гапи бор экан!

Беруний билан Гулсанам чиқиб кетишади.

Парда

ИККИНЧИ КУРИНИШ

Хоразмшоҳ саройидаги серҳашам хоналардан бири. Ҳона безатилган, ерга зарим тӯшаклар солинган. Ҳонтахта устида нозу неъматлар. Ҳарир либос кийган Сайёра заррин тӯшакда ёнбошлаб ётириди. Бир канизак елпигич билан уми елпиб ўтириди. Созанд қизлар нозик ва майнин бир куйни чалмоқдалар.

Гулсанам киради.

Гулсанам

Абу Райҳон Берунийни бошлаб келдим, маликам.

Сайёра

Ҳа, жуда сөз! Қани, кирсин! Бизни холи қолдиринг!

Ҳамма чиқиб кетади. Бир оздан сўнг Беруний киради.

Беруний

Салом.

Сайёра

Салом! Хуш келибсиз, азиз меҳмон!

Беруний

Ташаккур.

Нима, ёлғиз ўзингизми?

Сайёра

(кулиб)

Нега ҳадиксирайсиз?

Еб қўймайман.

Беруний

Гап ундумас... Менга бир оз ноқулай...

Сайёра

Ҳечқиси йўқ! Ўзингизни әркин тутинг бу ерда.
Рухсатим из бу хонага ҳеч ким кира олмайди.

Беруний

Кечирасиз, менга қандай хизматингиз бор эди?

Сайёра

Қани, аввал ўтиринг-чи!.. Тортинмасдан, яқинроқ!

Беруний

(ўзини ноқулай сезиб, бир чеккага омонат ўтиради)

Вақтим зиқроқ, ишим зарур, тезроқ жавоб берсангиз.

Сайёра

Қани, аввал, дастурхонга қаранг!

Беруний

Раҳмат, қорним түқ.

Сайёра (кулиб)

Жуда ўжар әкансиз-ку!

Беруний

Кечирасиз, маликам.

Сайёра

(ёнида турған чиройли қутичадан қимматбаҳо тошларни олиб, Берунийга беради)

Мановларни кўриб беринг! Ёқут, зумрад лаълилар...
Совға қилиб келтириши менга аслозодалар.
Сиз тошларнинг асрорини жуда яхши биласиз.

Б е р у н и й

(тошларни ҳаяжон ва эавқ билан томоша қилади)

О, бу тошлар жуда ноёб, жуда асл, баҳосиз!
Ҳиндистонлик заргарларнинг санъати бўр буларда!
Улар сайқал беришда ҳам қимматбаҳо тошларга
Дунёдаги барча заргар, усталардан ўтади!

С а й ё р а

Баъзисида аллақандай сирли дуо ёзилган,
Бу тошларнинг ҳосияти бошқачамиш...

Б е р у н и й

Масалан?

С а й ё р а

Гўёки, ким бу тошларни тақиб юрса, офатдан,
Куйдиргидан сақланармиш, уни илон чақмасмиш.
Бу зумрадни илон кўзи оқиб тушармиш.

Б е р у н и й

(кулиб)

Бу ёлғон гап! Бу афсона! Бу гапларга ишонманг!
Бу тошларда ҳеч қанақа хосият йўқ, қудрат йўқ.
Булар фақат безак, холос! Бу тошларни юзтасин
Тақсангиз ҳам дуч келсангиз илон чиқаверади,
Йўқ, бу тошлар сақлай олмас әгасини офатдан.

С а й ё р а

(Берунийга ҳирс билан тикилиб)

Ҳа, мұҳаббат дардидан ҳам сақлар әмиш бу тошлар.

Б е р у н и й

Ҳеч ишонманг! Барий ёлғон!

Сайёра

Мен ҳам ишонганим йўқ!
Рост, бу тошлар муҳаббатдан мени сақлай олмайди,
Ишқ ўтида ёнмоқдаман, ёрдам беринг!

Беруний

(ҳаяжонда)

Маликам,
Бу гапларни нима учун менга айтаётибсиз?!

Сайёра

Чунки менинг севганим — сиз!

Беруний

(ҳаяжонда ўрнидан иргиб туради)

Бу қандай гап! Ё раббий!
Қандай қилиб тил боради бу гапларни айтишга!

Сайёра

Иложим йўқ, Абу Райхон, юрагимни очмасам,
Тенгсиз ҳижрон азобида бўғиламан, ўламан.

Беруний

Ахир, бекам, әрингиз бор!

Сайёра

Мен әримни севмайман!

Беруний

Э, худойим, менга бўлак жазо, ташвиш йўқмиди!

Сайёра

Сиз ажойиб мунажжимсиз... Мен ҳам... севги бобида!
Мен муҳаббат осмонида ёруғ юлдуз ахтариб
Сизни топдим, Абу Райҳон!

Беруний

Янглишасиз, маликам!

Сайёра

Биламан, сиз Гулсанамни севасиз...

Беруний

Ҳа, севаман.

Сайёра

Наҳот мендай маликадан афзал бўлса канизак!

Беруний

Севги учун маликами, канизакми, фарқи йўқ.
Ошиқ фақат бўйсунади юрагининг амрига.
Ҳа, маликам, маликадан афзал менга канизак!

Сайёра

(Берунийнинг олдила тиз чўкиб)

Абу Райҳон, ёлвораман, маҳрум этма васлингдан!
Маликаман, қул бўл десанг, қул бўламан сен учун!

Беруний

Уят! Туриңг ўрнингиздан! Туриңг! Мени қийнаманг!
Дунёда энг ёмон кўрган нарсам менинг — хиёнат!

Шу топда орқа томондан аста босиб ўйчан Маъмун
киради. Уни кўриб, Сайёра газаб билан ўрнидан иргиб
туради.

Сайёра

Нима учун сўрамасдан ҳузуримга кирдингиз?
Пойлаб юрган әдингизми?!

Маъмун

Нега пойлай, маликам,
Хаёл суриб келиб қолдим...

Сайёра

Бир нафас ҳам ором йўқ!

Сайёра шитоб билан чиқиб кетади. Беруний қаттиқ хижолатда.

Беруний

Кечирсинлар, мени, шоҳим, менда гуноҳ...

Маъмун

(сўзини бўлиб)

Гуноҳ йўқ!
Ажабланманг, бу табиий бир ҳодиса, хонимнинг
Навбатдаги инжиқлиги, навбатдаги шўхлиги...

Беруний

Ахир, шоҳим...

Маъмун

Ташвишланманг! Агар унинг феълини
Билмагандা сиздан хафа бўлар әдим. Ҳолбукий,
Бу илоннинг кирдикори, иши, хулқу атвори
Менга маълум...

Беруний

Ундаи бўлса...

Маъмун

Осон эмас, азизим...

Эҳтимол у шу йўл билан орамиэга совуқлик
Ва тафриқа солмоқчидир... Жанжал чиқармоқчидир...
Оғасига бир баҳона топиларди у ҳолда...
Саройда мен ёлғиз қолдим... Яқинлардан айрилдим...
Мана, катта қалика ҳам шу илоннинг қурбони.
Заҳар берган ўша, аммо, исбот қилиб бўлмайди...
Бу кетишида ўзимга ҳам навбат келиб қолмаса.
Деб қўрқаман... Ўз уйимда бегонаман, ортиқман.
Бутун сарой Қоратегин, Сайёранинг қўлида,
Ушаларга бўйсунади хизматчилар, соқчилар.
Мана, ҳали Дабирни ҳам банди зиндан қилишибди.
Битта ўша менга ҳалол хизмат қилиб турувди...
Бу газанда менга қарши бир баҳона топсаю
Оғасига хабар берса, Хоразмни забт этса...
Мен Маҳмуднинг менга қилган марҳамати оқибат
Шундай аянч натижалар беришини билмасдим...
О, азизим, әнди сарой менга зиндан, жаҳаннам!

Беруний

Минг афсуски, бу аҳволға ўзингиз ҳам айбдорсиз!
Каттиқўллик қилиш керак, шоҳим, давлат ишида.
Ҳаммасини ҳайдар әдим ўрнингизда мен бўлсан!
Урӯш деса, урушардим, қўрқиб ўтиրмас әдим!

Маъмун

Йўқ, Маҳмуднинг қўшини кўп, бардош берा олмаймиз!

Беруний

Халқимизга суннадим, халқни жангга чөрлардим,
Хоразмнинг арслонлари жангда енгилган эмас!

Маъмун

Тўғри, аммо, жуда мушкул бу ишларни ҳал қилиш...

Беруний

Дунёда ҳеч осон иш йўқ! Осон ишни ахтарманг!
Алалхусус, катта ишнинг мاشаққати кўп бўлур!
Машаққатга чидаганлар доим зафар қозонур.
Кўпчиликнинг овозига қулоқ солганингизда,
Қилган ишни дўстлар билан бамаслаҳат қилганда,
Бу фожиа, бу кўргулик юз бермаган бўларди!

Маъмун

Гапларингиз тўғри, аммо, вақти ўтган...

Беруний

Халқ ғазабда, халқ норози! Исён қўтармоқчи халқ!
Минг афсус!

Маъмун

Сабаби не?

Беруний

Яна беклар сувни босиб олибди.
Деҳқонларнинг ери сувсиз, қуримоқда экинлар.
Шоҳим, халқнинг адолатли талабини қондиринг!
Агарда халқ тинчимаса, мамлакат ҳам тинчимас.
Сув бобида қоидани ва тартибни бузганлар,
Ким бўлмасин, жазосини тортишлари керакдир.

Маъмун

Биласиз-ку, ҳозир беклар менга қулоқ солмайди.
Абу Райён, ҳозир бошқа ташвишлар бор бошимда...
Ички исён хавфли эмас, бостирамиз куч билан.
Ташқи ёвни ўйлаш керак, жуда хавфли ташқи ёв.
Халққа бориб бу гапларни тушунтиринг, тушунсин.

Беруний

Афсуски, шоҳ, бу гапларнинг халққа сира нафи йўқ!
Менга рухсат!

Маъмун

Сабр қилинг. Яна султон Маҳмуддан
Нома келди, шу номани эрта-индин тўпланиб
Муҳокама қилмоқчимиз, сиз ҳам келинг, илтимос!

Беруний

Хўп, келаман.

Маъмун

Маликанинг найрангини унутинг.
Қани юринг, аввал сизга ўша хатни кўрсатай.

Беруний билан Маъмун чиқиб кетадилар. Бир оздан
сўнг Сайёра орқасидан Сухсур киради.

Сайёра

Сўзларини эшитдингми?

Сухсур

Ҳаммасини эшитдим.

Сайёра

Яхши, кейин ҳаммасини менга айтиб берарсан.

Сухсур

Жоним билан.

Сайёра

Хўп, майли бор, чақирганда киарсан.

Сухсур

Хўп бўлади, амрингизга мунтазирман, маликам.

Сухсур чиқиб кетади.

Сайёра

О, режалар оша қолса әди тезроқ амалга,
Хоҳишимча яшар әдим, яшар әдим ниқобсиз...
Шоҳ жонимга тегди жуда... Қоратегин дағал, мол...
Ха, амалга ошмайдиган кўринади оғамнинг
Менга берган топшириғи... Ўжар әкан Беруний...
Кизик, ўйин десам сира ўхшамайди ўйинга.
Наҳотки, мен Берунийни севиб қолсам? Ҳа, шундай...
Аллақандай жозиба бор, улуғлик бор олимда.
Мажбур этар кеча-кундуз ўз ҳақида ўйлашга.
Нега мендан ҳазар қилур? Нега менга кўнгли йўқ?
Гўзалман-ку! Гўзаллигим нё-не аслзодани
Бир кўришда телба қилган!. Аммо, аммо Беруний
Менга худди ялмоғизга қарагандай қарайди.
Менга нафрат билан қарап, бу мен учун ҳақорат!
Қандай қилиб зарба берай унинг мағрур қалбига?
Қандай қилиб қасос олай мендан кулган одамдан?
Ҳа, Гулсанам унинг қалби! Зарба берай қалбига!

Хонтахта устида турган олтин қўзадаги шаробдан икки биллур
қадаҳга қуяди. Бармогидаги олтин узукни очиб, қадаҳларнинг би-
рига заҳар солади. Сўнг, қарсак чалади. Сұхсур киради.

Сұхсур

Хизмат, бекам?

Сайёра

Гулсанамни чақир, унда гапим бор.

Сұхсур

Хўб бўлади.

(Чиқиб кетади.)

Сайёра

Гуноҳимни ўзинг кечир, худойим.

Гулсанам киради.

Гулсанам

Чақирибсиз, бекам?

Сайёра

Ха, кел, пича отамлашайлик.
Кани, ўтир!

Гулсанам

Рахмат, бекам.

(Ўтиради.)

Сайёра

(унга тикилиб).

Ха, чиройли экансан..

Авваллари сенга яхши қарамаган эканман.

Гулсанам

Уялтирганг... Бу даргоҳда сиздан гўзал аёл йўқ!

Сайёра

Берунийни севасанми?

Гулсанам

(ҳаяжонда)

Нима, ўзи айтдими?

Сайёра

Ўзи айтди... У ҳам сени севар экан...

Гулсанам

Худойим!

Сайёра

Жуда қаттиқ севасанми?

Гулсанам

Жуда қаттиқ севаман!

Сайёра

Абу Райҳон жонингни бер деса, берар эдингми?

Гулсанам

Жон-жон дея берар эдим юзта жоним бўлса ҳам!

Сайёра

Абу Райҳон Берунийни севишингга ишондим,
Севганингнинг баҳти учун узоқ яша, Гулсанам!

Гулсанам

Раҳмат сизга, улуғ бекам! Раҳмат сизга, маликам!

Сайёра

(захар солинган қадаҳни Гулсанамга беради)

Ҳўб, бўлмаса, Берунийнинг соғлигига ичайлик!

Гулсанам

Берунийнинг соғлигига жон-жон дея ичаман!

Ичадилар. Кўп ўтмай, Гулсанам бўғила бошлайди.

Сайёра

Ҳа, шунақа! Бу шум дунё кимга вафо қилибди!

Гулсанам

(бўғилиб)

Нима бериб эдинг, жаллод, юрак-бағрим ёнмоқда!..

Сайёра

Бир оз сабр эт! Бу дунёнинг барча ташвишларидан
Халос бўлиб, тўппа-тўғри йўл оласан жаннатга!

Гулсанам

Абу Райхон!.. Абу Райхон!.. Абу Райхон!.. Алавидо!..
Гулсанам ўлади.

Сайёра

Сухсур! Сухсур!

Сухсур

(кириб)

Лаббай, бекам! Ие, шўрлик ўлдими?

Сайёра

Қоратегин кирсин, чақир!

Сухсур

Хўб бўлади. Вой, шўрлик!

Сухсур чиқиб кетади. Бир оздан сўнг, Қоратегин киради.

Қоратегин

Нима бўлди? Улибди-ку!

Сайёра

Захар ичиб қўйибди,

Сабабкори юраги тош Абу Райхон Беруний!
Мурдасини олиб бориб Берунийга берасан,
Узи кўмсин ҳижронида ҳалок бўлган ёрини!
Айрилиққа чидомасдан заҳар ичиб ўлди, де!

Қоратегин Гулсанамнинг жасадини олиб чиқиб
кетади.

О, Беруний! О, тошюрак! Энди менинг зарбамга
Қандай бардош бера олур экан мағрур юрагинг!

Парда

ТҮРТИНЧИ ПАРДА

УЧИНЧИ КУРИНИШ

Биринчи саҳнадаги манзара. Шоҳ Маъмун ғамгин, ўз тахтида ўтирибди. Саройга Хоразмининг аркони давлатлари, аслазодалар, беклар, лашкарбошилар тўплланганлар. Буларнинг орасида Беруний, Ибн Сино, Суҳайлий, Шайхулислом, Маймандий, Қоратегин, Сополтегинлар ҳам бор. Булар Султон Маҳмуддан келган мактубни муҳокама қилиш учун йиғилишган. Вазият жиддий, оғир.

Маймандий

Бир маротаба, улуғ султонимизнинг ҳақли талабларини ноҳақ рад этиб, хатога йўл қўйдингиз. Султонимизнинг муборак номларини хутбага қўшиб ўқитмадингиз.

Беруний

Жуда тўғри қилинган!

Шайхулислом

Мутлақо нотўғри қилинган!

Маймандий

Муҳтарам зотлар, мен ҳали сўзимни тугатганим йўқ. Мен тахти олийга тўплangan эътиборли жамоатга: аҳли

саройга, аслзодаларга, бекларга, лашкарбошиларга султонимизнинг Хоразмшоҳ номига юборган сўнгги ва табаррук мактубларини ўқиб әшиитирмоқчиман. Мактуб: «Хоразмшоҳ бу ишнинг оқибати нималарга олиб келишини билиб, хутба масаласида бизнинг амру фармонимизга бўйсунган бўларди-ю, аммо унинг аъёнлари бунга йўл қўймаган кўринади. Ўз ҳукмдорига уни қил, буни қилма, деб ўз хоҳишлини ўтказган кимсаларни «фуқаро», ёки «лашкарбоши» деб айтмолмаймиз. Зероки, шунинг ўзидаёт давлатнинг заифлиги намоён бўлади. Биз, бу тоифа бешшларга нисбатан дарғазаб бўлиб Балх шаҳрида узоқ туриб қолдик ва бу ерда юз минг лашкар ва беш юз нафар фили жангни тўпладик. Муродимиз Хоразмга юриш бошлаб, ўз ҳукмдорининг раъйига монелик қилган бадкирдорларга жазо бермоқ ва уларни ҳақ йўлга қайтармоқ эди. Шунинг билан бирга, биз, биродаримиз, жезнамиз шоҳ Маъмунни ҳам ғафлат уйқусидан уйғотиб, давлатни қандай идора қилишни унга ўргатиб қўймоқчи эдик. Чунки, заиф амир давлатни идора қиломайди. Аммо яна бир карра сабру қаноат қилишни ва севикли куёвимиз шоҳ Маъмунга эси ҳушини йиғиб олишни ҳавола қилишни лозим топдук. Нима бўлганда ҳам Хоразмшоҳ бу сафар султон Маҳмуд Газнавий номига хутба ўқитади ва шу билан Газнага тобелигини билдиради, деган умиддамиз. Агарда...»

Шунқорбек

Англашилди!

Жайхунбек

Тушунарли!

Қоплон ботир

Етар, вазир, бас қилинг!

Маймандий

Бас қил десанг, бас қиласман. Қани, шоҳим, не дейсиз?

Маъмун

(шошиб, ўзини йўқотиб)

Нимага мен?!

Суҳайлий

Чунки, шоҳсиз! Мамлакатнинг ҳокими!

Маъмун

Йўқ, йўқ! Аввал, әшитайлик бошқаларнинг фикрини.

Беруний

Ахир, шоҳим, биласиз-ку бошқаларнинг фикрини!
Нега керак қайта-қайта тушунириш, тақорорлаш!

Маъмун

Фикрингизни Маймандийнинг ҳузурида айтинглар,
Токи, вазир ўз қулоги билан гапни эшитсин!

Беруний

Султон Маҳмуд Ғазнавийнинг талаби рад этилсин!

Шайхулислом

Ахир, нега бундай дейсиз! Жанжал, уруш чиқармиш,
Беҳудага қон тўкишлиқ нега керак, Беруний!
Канча ҳурмат қилсак арзир Маҳмуд каби ғозийни!

Ибн Сино

Сўзларингиз хоинларнинг сўзи әрур, тақсирим!

Шайхулислом

Сиз гапирманг, Ибн Сино! Сиз даҳрийсиз! Кофирсиз!

Қоплон ботир

Тақсир, сиздек мусулмондан кўра даҳрий саналган
Ибн Сино айтган сўзлар афзал эрур биз учун!

Суҳайлий

Тушунинглар! Фазнавийнинг мақсадлари беғараз!

Беруний

Ундаи бўлса, нима учун Хоразмни Маҳмуднинг
Сарбозлари босиб кетди? Нима учун дарвишлар,
Қаландарлар, савдогарлар, девоналар, дайдилар —
Кўча-кўйда изғиб юрар қутқу солиб тинмасдан!
Нима учун бозорларда, мачитларда Маҳмудни
Осмонларга кўтаришиб мадҳ этмоқда маддоҳлар?!
Кофириларга қарши жангга, ғазавотга отланинг,
Даҳрийларни юртдан ҳайданг, дея улар жар солиб,
Фуқарони галаёнга солмоқдалар не учун?!
Йўқ, Суҳайлий, бу ишларнинг замирида ғараз бор!
Саройда ҳам Фазнавийнинг одамлари ҳукмрон!

Маймандий

Бу табиий! Чунки султон қариндоши, куёви
Шоҳ Маъмунни хоразмлик бебошлардан сақлайди!

Шовқин кўтарилади.

Шунқорбек

Бу қандай гап!

Жайхунбек

Беҳаёлик!

Қоплон ботир

Бу биз учун ҳақорат!

Сұхайлий

Беклар, шовқин күттарманглар! Қоплон ботир, тинчланинг.

Беруний

Агар Маҳмуд Ғазнавийнинг талабини қондирсак,
Агар хутба ўқитилса Ғазнавийнинг номига,
Хоразмни икки қўллаб унга тутган бўлардик!
Сўнг, Хоразм қарам бўлиб қолур әди Ғазнага!

Маъмун

Ундаи эмас! Кўп оширманг, Абу Райҳон Беруний!
Султон мени иззат қилур. Агар унинг номига
Хутба ўқитилганда ҳам Хоразмнинг шаънига
Доғ тушмайди, мавқенини йўқотмайди Хоразм.

Шайхулислом

Боракалло! Гапингиз ҳақ! Биз хурсандмиз, шаҳаншоҳ!

Беруний

Демак, султон талабини қабул қилмоқчимисиз?

Маъмун

Бошқа илож топилмайди. Абу Райҳон, азизлар!..

Яна шовқин кўтарилади. Беклар, лашкарбошилар қилич ялангочлаб, шоҳга ҳужум қиласидар. Қоратегин, Сополтегин ва уларнинг сарбозлари ҳам қилич ялангочлаб, шоҳни ҳимоя қиласидар.

Шунқорбек

Бу хиёнат!

Жайхунбек

Бу сотқинлик!

Қоплон ботир

Ўлим! Ўлим, сотқинга!

Қ о р а т е г и н

Ўзингни бос, Қоплон ботир!

С о п о л т е г и н

Кўлингни торт, ҳовлиқма!

Ҳамма ҳаяжонда, саросимада. Баъзилар қўрқиб,
саройдан тез чиқиб кетадилар.

Ш а й х у л и с л о м

Шошманг! Тўхтанг! Бу қандай гап! Оздингизми ақлдан!
Қандай қилиб шоҳга қарши қилич яланғочлайсиз!

Қ о п л о н б о т и р

Бу шоҳ әмас, хиёнатчи!

Ш у н қ о р б е к

Шоҳ сотилган!

Ж а й ҳ у н б е к

Шоҳ — сотқин!

Б е р у н и ў

Қизишманглар! Беҳуда қон тўкилмасин! Қизишманг!

Қоплон ботир ғазаб билан қиличини қинга солади.
Бошқалар ҳам қиличларини гилофига соладилар.

Қ о п л о н б о т и р

Шуни яхши билиб қўйинг, Шайхулислом, шаҳаншоҳ,
Сизлар юртни берсангиз ҳам биз бермаймиз душманга!
Сизлар юртни сотсангиз ҳам биз сотмаймиз ҳеч қачон!
Ҳеч қанақа ёвузга ҳам қул бўлмайди Хоразм!
Хоразмнинг лашкари бор! Хоразмнинг халқи бор!

Ал Хоразмий юрти оёқ ости бўлмас ҳеч қачон!
Хоразмнинг дуддуллари ҳали кишинаб турибди.
Хоразмнинг сарҳадлари ҳали жуда мустаҳкам!
Қўлимиздан ҳали қурол тушган эмас, тушмайди!
Евга қарши жанг қиласиз бир томчи қон қолгунча!
Билиб қўйинг Қоратегин, Сополтегин, Маймандий,
Агар юртга бош суқсангиз, бошдан жудо бўласиз!
Шоҳ кўнса ҳам халқ кўнмайди Ғазнавийнинг сўзига!
Қани, кетдик, биродарлар, тарк этамиз саройни!
Субутсизлар ва қўрқоқлар жон сақласин саройда!

Коплон ботир бошлиқ беклар, лашкарбошилар
шитоб билан саройдан чиқиб кетишади.

Маъмун

(саросимада)

Вазир, энди нима қилдик?

Суҳайлий

Ҳа, яхши иш бўлмади...

Маъмун

Абу Райҳон, нима қилай?

Беруний

Мен ҳеч қачон, шаҳаншоҳ,
Сизни шундай қиёфада, шундай аянч аҳволда
Кўраман деб ўйламаган әдим... Афсус... Минг афсус...
Олиб бўлмас энди, шоҳим, ҳалокатнинг олдини.
Шоҳим, мени кечирсинглар, сиз муносиб әмассиз
Хоразмдай улуғ юртга, буюк, шонли ўлкага!
Ибн Сино, кетдик, биз ҳам ортиқчамиз саройда!

Беруний билан Ибн Сино чиқиб кетадилар.

Маъмун

(бақириб)

Тақсир, ахир бирор нарса десангиз-чи! Бу не ҳол!
Бу тушимми ё ўнгимми?! Ёрилгудек юрагим!

Шайхулислом

Қўрқманг, шоҳим, улуғ султон ўзи сизни қутқарур!
Яхши бўлди ғаламислар, даҳрийларнинг кетгани!

Маъмун

Яхши әмас! Яхшироқдир бу кунимдан ўлганим!

Шайхулислом

Мен ҳам кетдим, шаҳаншоҳим, намоз қазо бўлмасин!

Шайхулислом чиқиб кетади.

Суҳайлий

Ҳа, тақдирга тан беришдан бошқа чора қолмади.

Суҳайлий ҳам чиқиб кетади. Шоҳ ғамгин, ўйчан
чиқиб кетади. Сайёра киради.

Сайёра

Ҳамма гапдан хабарим бор! Ҳамма сўзни эшилдим!
Кўнгилдаги гаплар бўлди!

Маймандий

Худди шундай, маликам.

Қоратегин

Мана энди, режаларни оширамиз амалга!

Маймандий

Баҳоналар етарлидир!..

Сайёра

Сополтегин, хабар қил!
Иш бошласин айғоқчилар, суворийлар, жосуслар.
Ҳамма ерда баббаробар жанг ва қирғин бошлансан!
Тўғонларни бузинг дарҳол, сувсиэ қолсин Хораэм.

Мұхим жойлар, истеңкомлар дарқол қўлга олинсин!
Ўт қўйилсин шаҳарларга, қишлоқларга, саройга!

Сополтегин

Ҳаммасини бажарамиз, хотиржам бўл, маликам!

Сополтегин чиқиб кетади. Ташқарида шовқин кўтарилади.
жанг садолари, қиличларнинг шарақлаган товушлари эшитилади.
Сарой атрофида ёнгин шуълалари кўрина бошлайди. Ҳовлиқиб
Маъмун киради.

Маъмун

Нима бўлди? Нима шовқин?! Қаранг, сарой ёнмоқда!

Сайёра

Хоразмнинг бебошлари саройингга ўт қўйди.
Ичкарига киришмоқчи, бизни ҳалок этгали!

Маъмун

Э, худойим! Қоратегин, сарбозларинг қаерда?
Чақир, бизни қўриқласин!

Қоратегин

Улар жангда, шаҳаншоҳ.

Сайёра

Қўрқма, Маъмун, сени ёлғиз мен қўриқлай оламан!

Сайёра Маъмуннинг кўксига ханжар уради, Маъмун йиқилади.

Маъмун

О, хиёнат!.. Абу Райҳон, Қоплон ботир, қайдасиз!..
Мени булар ўлдирмоқчи... Тезроқ келинг... Қутқаринг...

Маъмун ўлади. Ичкаридан саросимада сарой аҳллари,
канизаклар чиқишади. Ҳамма даҳшатда.

Сайёра

(Маъмуннинг устига ўзини ташлаб докулиларча йиглайди).

Э, худойим, ожизларни паноҳингда сақлагил!
Тақдир экан, қандоқ қилай, бари сенинг ироданг!
Хоразмнинг бебошлари шоҳ Маъмунни ўлдириди.
Мени жудо қилишдилар севган вафодоримдан!
Парвардигор, қотилларга ўзинг дарҳол жазо бер!
Улуг вазир, ёлвораман, бориб айтинг оғамга,
Тезлик билан Хоразмга қўшин тортсин, от қўйисин!
Мени, ёлғиз синглисини ҳалокатдан қутқарсин!
Хоразмда исён! Исён! Бизга қарши қўзғолон!
Дод, худойим, золимларнинг, қотилларнинг дастидан!
Кечир мени, меҳрибоним, сени асрай олмадим.
Хоразмлик бадкирдорлар сенинг разил қотилинг!

Сарой аҳллари, канизаклар Сайёрага қўшилиб йиглашади.

Ҳар томондан ўт қўйдилар, ёнмоқдадир пойттахт!
Бу оловни ёлғиз оғам ўчириши мумкиндири.
Бориб айтинг, қонли ёшим Жайҳун бўлиб оқмасин!
Бориб айтинг, интизорман йўлларига оғамнинг!

Маймандий

Сўзларингни дарҳол бориб султонимга айтаман!

Маймандий кетади. Канизаклар йигилишади. Атрофда шовқин, фарёд, аланга кучая боради.

Парда

Тўртинчи қуриниш

Беруний богининг бир чеккаси. Даҳшатли тун, узоқдан шовқин, доду фарёд эшитилмоқда, ёнғинларнинг мудҳиш шуъласи осмонни ёритмоқда. Беруний ғамгин, Гулсанамнинг қабри устида турибди.

Беруний

Кўз ёшларим мозорингга тўкилмоқда, Гулсанам,
Сен кўрмайсан, сен сезмайсан, тинч уйқуда ётибсан.

Қабрингдан чиқ, Ҳоразмга бир назар сол, азизам,
Ёвузларнинг товонида топталмоқда Ҳоразм.
Таланмоқда, ёнмоқдадир баҳти қора она юрт.
Сен қабрингда тинч ётибсан, дунё эса нотинчdir.
Даҳшат тўла дунёмизда ажал қанот қоқмоқда,
Бошларимга тегиб ўтган каби бўлур қаноти...
О, азизам, не сабабдан мени ёлғиз қолдирдинг!
Бу дунёда овунчогим ва қувончим сен әдинг.
Якка қолдим, ёлғиз қолдим бу серғавғо жаҳонда...
Сен қоласан энди, жоним, мен кетаман узоққа.
Дунё қонли тузоқ әкан, мен ҳам тушдим тузоққа...

Ғамгин Жаъфар киради.

Жаъфар

Юклар бари тайёр бўлди. Юринг, устоз, кетайлик.
Хайрлашиб бўлгандирсиз...

Беруний

Жилиш қийин бу ердан,
Худди ушлаб турган каби әтагимдан Гулсанам...

Жаъфар

Азиз устоз, фойдаси йўқ, қайтиб чиқмас қабрдан.
Ёв яқинлаб келмоқдадир, ёмон бўлур кетмасак.
Юринг, устоз, ёлвораман!

Беруний

Дўстим, яна гул келтири.
Сўнгги марта гул сочайин Гулсанамнинг қабрига...

Жаъфар чиқиб кетади. Беруний тиз чўкиб қабрни ўпади,
ёшини артади. Жаъфар бир қучоқ гул келтиради.

Жаъфар

Мана, устоз, гул келтирдим.

Б е р у н и й

(ўрнидан туради, гулларни олиб Гулсанамнинг қабрига сочади)

Гулни яхши кўрарди...
Барча китоб, қўл ёзмалар олиндими?

Ж а ъ ф а р

Олинди.

Ҳеч бир нарса қолгани йўқ. Юринг, тезроқ кетайлик!

Б е р у н и й

Агар менга бирор нарса бўла қолса, азизим,
Қўл ёзмалар, китобларим йўқолмасин.

Ж а ъ ф а р

Йўқолмас.

Ташқаридан от туёқларининг дупури әшитилади. Бир оздан сўнг
Ибн Сино билан Худой берди киришади. Иккови ҳам йўл
кийимида, қўлларида қамчи.

И б н С и н о

Қани, дўстлар, тайёрмисиз?

Б е р у н и й

Сизлар бора туринглар,
Биз ҳадемай йўлга чиқиб, сизга етиб оламиз.

И б н С и н о

Ибн Ироқ, Масиҳийлар аллақачон кетишиди,
Биз кечикдик, вақт ғанимат, фурсат қўлдан кетмасин!

Б е р у н и й

Қоплон ботир келаман деб ваъда берган, келади.
Уни кутмай кетиб қолсам уят бўлур, азизим.
У биз билан ҳамроҳ бўлиб бормоқчилик сафарга.

И б н С и н о

Ундай бўлса Чуқурсойнинг нарёғида кутамиз.

Ж а ғ ф а р

Қумбосканнинг ёнидами?

Х у д о й б е р д и

Ҳа, шу ерда кутамиз.

И б н С и н о

Абу Райҳон, тезроқ боринг, кўнглим жуда безовта.

Б е р у н и й

Ташвиш қилманг, тезда дийдор кўришамиз, азиизим,
Қаранг, дўстим, ўртамоқда, кул бўлмоқда Ҳоразм!

И б н С и н о

Қандай даҳшат! Э, худойим, гуноҳимиз не әди!
Ҳўб, биз кетдик. Тезроқ боринг!

Б е р у н и й

Орқангиздан етамиз.

Ибн Сино билан Беруний қучоқлашиб хайрлашадилар. Сўнг И б н С и н о ва Х у д о й б е р д и чиқиб кетишади. Кўп ўтмай, дарвоза ёнидан чопиб кетган от туёқларининг дупури эшитилади.

Б е р у н и й

(узоқлашиб бораётган от туёқларининг дупурига
қулоқ солади)

Қоплон ботир бунча ҳаяллади... Таажжуб...

Ж а ғ ф а р

Жанг қилмоқда бўлса керак... Ё қуршовда қолгандир...

Сонлари тўзиган, кийимлари йиртилган, куйган Бибисора кириб келади. Бир қўлида қуруқ сопол коса. Уни кўриб Беруний даҳшатга тушади. Жаъфар ҳайратда, қўроқувда.

Бибисора

Мана, сув... Ичинг!.. Ичинг!.. Хоразмда сув йўқ.. Тўғонларни бузиб ташлаши... Мен бу сувни Амудан келтирдим... Ичинг!.. Ичинг!.. (Инглайди.) О, шўрим... Хоразмга ўт қўйдилар... Хоразм ёниб кетди... Ана! Еняпти!.. Сув сепинг!.. Сув сепинг!.. Ўтии ўчиринг!.. Менинг уйим ҳам ёниб кетди... Боламни қилич билан чопишиб, ўлигини қузғунларга ташлаши... Боламни қузғунлар еб қўйди... Ёлғиз боламни... Энди тузалувди... Боламни қайтариб беринглар!.. Золимлар!.. Жаллодлар!.. Дод!.. Дастингиздан дод!.. Боламни қайтариб беринглар!.. (Инглаб югурганча чиқиб кетади.)

Беруний

Қандай даҳшат! Қандай даҳшат! Фожианинг сўнгги йўқ!.. Даҳшатларга дош беролмай телба бўлмиш, бечора...

Жаъфар

Ҳа, бечора Бибисора тамом озмиш ақлдан.

Шу пайт яралантан, қонга беланган Қоплон ботир қиличини судраб, гандираклаб, зўрга юриб кириб келади.

Беруний

(ҳаяжонда)

Қоплон ботир, нима бўлди?

Қоплон ботир

Яраландим...

Беруний

Е, раббий!

Қоплон ботир

Алладилар... Биз алдандик... Ҳа, саройда хиёнат!..
Шоҳ Мамунни ўлдирилар... Ўт қўйишди саройга..

Беруний

Бошимизга бало ёғди! Даҳшат устига даҳшат!

Қоплон ботир

Кўчаларда жанг бормоқда... Ялпи қирғин бошланди...
Шунқорбек ҳам, Жайхунбек ҳам ҳалок бўлди урушда...

Беруний

Жаъфар! Қани, ярасини тезроқ боғланг!

Жаъфар

Хўб, ҳозир.

Қоплон ботир

Мени қўйинг... Қуним битди... Тезроқ қочинг...
Қочинглар...
Ҳадемасдан уйингизга душман босиб келади...
Афсус, энди сизга ёрдам беролмайман... кечиринг...
Сизни ёвдан қўриқламоқ әди менинг мақсадим...
Афсус... Афсус... мақсадимга етолмадим... минг афсус...

Қоплон ботир йиқилиб ўлади.

Беруний

(ҳаяжонда)

Шўрлик ўлди!.. Қандай даҳшат! Қандай даҳшат!
Худойим!

Ташқаридан шовқин, қилич жаранглари эшитилади. Кўп ўтмай,
қўлларида яланғоч қиличи, бир неча навкарлар билан Қо-
ратегин, Сополтегинлар кириб келишади.

Қоратегин

Ҳа, ҳайрият, уйда экан! Бахтимиздан ўргилай!

Сополтегин

Энди ҳорма, Абу Райхон, ахир қўлга тушдинг-ку!

Қоратегин

Бундай улуғ асир учун султон Маҳмуд Фазнавий,
Бўйимизга ўлчаб туриб бизга олтин беради!

Сополтегин

(Қоплон ботирнинг жасадини телиб)

Аблаҳ, ахир ўлибди-ку! Юз кишининг бошини —
Еди жангда! Мени эса, оғир ярадор қилди.
Ҳақиқатан бу ярамас уста қиличбоз экан.

Беруний

Тепма унинг жасадини ифлос оёғинг билан!

Сополтегин

Ҳо, ҳали ҳам бўш келмайди бу зот қўлга тушса-да!

Қоратегин

Қани дарҳол киshan солинг оёғига, қўлига!
Қилмишига лойиқ энди жазосини тортади!

Навкарлар Берунийнинг қўл-оёғига киshan соладилар.

Жаъфар

(йиғлаб)

Аэлиз устоз!..

Беруний

Қўй, йиғлама! Баланд кўтар бошингни!
Бу золимлар, бу аглаҳлар кўз ёшингни кўрмасин!

С о п о л т е г и н

Тилингни тий!

Б е р у н и й

Ҳеч вақт, малъун, тиёлмайсан тилемни!
Кўлларимга кишан солдинг, аммо менинг тилемга
Асло кишан сололмайсан, Ғазнавийнинг кўпаги!

Қ о р а т е г и н

(захарханда билан)

Султон Маҳмуд ҳузурида бошқачароқ сайдайсан!
Қани, юринг, калондимоғ Абу Райҳон Беруний!

Берунийни олиб чиқиб кетадилар.

П а р д а

Б Е Ш И Н Ч И Қ У Р И Н И Ш

Урганчнинг бир чеккаси, дала. Султон Маҳмуднинг қароргоҳи, оқ чодир. Узоқдан ёнаётган Урганчнинг аланглари кўриниб туради, жанг шовқинлари, отларнинг кишинашлари, одамларнинг фарёди эшитилиб туради. Даҳшатли ва хотинч тун.
Султон Маҳмуд чодирда яқин аъёнлари билан май ичиб ўтирибди. Чодирни белларига олтин камар боғлаган, ҳарбий киймли хос ғуломлар сақламоқда. Султон Маҳмуд хурсанд, мағрур, ширакайф.

М а ҳ м у д

Хоразмнинг пойтахти бошдан-оёқ ёнмоқда,
Мен исиниб ўтирибман унинг алангасида.
Қулоғимга чалинмоқда мағлубларнинг фарёди,
Биз голибмиз! Тангри бизни ёрлақади бу гал ҳам!

М а й м а н д и й

Чунки, султон, сиз гозийсиз! Сиз голибсиз доимо!
Тангри севган бандасига зафар ато қилади!

Маҳмуд

Барча қишлоқ ёндирилсин! Урганч хароб әтилсин!
Тўғонларни бузиб ташланг! Боғлар пайҳон қилинсин!
Ишга яроқсиз касаллар, кексалар қатл әтилсин!
Еш-яланглар қул қилиниб, бозорларда сотилсин!
Хунармандлар, косибларни жўнатинглар Газнага,
Ўша ерда ишласинлар бойлик қўшиб бойликка.
Хоразмнинг хазинаси, бойликлари филларга
Ортилсину хазинамга юборилсин.

Маймандий

Хўб, султон!
Ҳаммаси ҳам бажарилур.

Маҳмуд

Уч кун муҳлат беринглар,
Ҳалқни талаб, ўлжаларга бойиб олсин аскарлар.

Маймандий

Хотиржам бўл, улуғ султон, айтганингдек қиласиз.

Маҳмуд

Хоразмнинг куни битди! Ҳа, бу ёруғ жаҳонда
Битта Газна обод бўлса, етади!

Маймандий

Ҳа, шубҳасиз!

Ташқарида чопиб келиб тўхтаган от туёқларининг дупури әшити-
лади. Кўп ўтмасдан, әркакча кийинган, қилич ва қалқон таққан,
олтин дубулға кийган Сайёра кириб келади.

Сайёра

(қўчоқ очиб)
Омонмисан, оғажоним! Соғ-саломат бормисан!

Маҳмуд

О, Ҳоразм маликаси!

Сайёра

(Маҳмуднинг бўйнидан қучоқлаб)

Сени жуда согиндим!

Маҳмуд

(Сайёрани қучоқлаб, эркалаб)

Қойил қилдинг, азиз синглим! Сендан жуда розиман!

Маймандий

**Оғасидек кўп ақлли! Оғасидек тадбиркор!
Оғасидек олий мақом! Оғасидек довюрак!
Ҳақиқатан султон Маҳмуд Газнавийнинг синглиси!**

Маҳмуд

**Ҳа, синглимнинг билагида юз арслоннинг кучи бор!
Юз йигитнинг юрагидан афзал эрур юраги!**

(кулиб)

Ҳийлада ҳам юз шайтонга, минг иблисга дарс берур!

Сайёра

(кулиб)

Чунки менинг қиблагоҳим, устозим сен, оғажон!

Маҳмуд

(кулиб)

**Оббо, сен-еӣ! Қани, вазир, шаробдан қуй, синглимнинг
Соғлиғига оқ ичайлик! Ҳамма қадаҳ кўтарсин!**

Май мандий

(май қуийиб ҳаммага улашади)

Жоним билан маликанинг соғлигига ичаман!

Шайхулисломдан бўлак ҳамма ичади.

Маҳмуд

(Шайхулисломга хўмрайиб қараб)

Сиз нимага ичмадингиз?!

Шайхулислом

Мен умуман ичмайман...

Маҳмуд

Бу ер менинг қароргоҳим! Бу ерда мен ҳокимман!
Қари тулки, нима учун буйруғимни бузасан?!
Ё сен биздан афзалмисан?!

Шайхулислом

(қўрқиб)

Кечирасиз, султоним!

Маҳмуд

Ё сени ҳам ҳузуримга ажал ҳайдаб келдими?!

Шайхулислом

(даҳшатда)

Йўқ, йўқ, султон, узр, узр, ич десангиз ичаман!

Шайхулислом шошиб, соқолларига тўкиб, май ичади.
Ҳамма ундан кулади.

Маҳмуд

Энди жўна ҳузуримдан! Чодиримдан чиқиб кет!
Ғазабимни қелтиромасдан, узоқроқ юр кўзимдан!
Хоинларни ёқтиромайман! Мунофиқлар душманим!

Шайхулислом

(қалтираб)

Хўб бўлади, улуғ султон, кет десангиз, кетаман...

(гандираклаб чиқиб кетади.)

Маҳмуд

Бу расвонинг хизмати кўп Хоразмни сотишда,
Кези келса, бизларни ҳам тап тортмасдан сотади.

Сайёра

Оға, энди менга рухсат!

Маҳмуд

Нега бунча шошасан!
Эндиги жанг, эндиги иш бўлаверар сенсиз ҳам.

Сайёра

Шаҳзодани кўрмакчиман. Шаҳзодани соғинидим!

Маҳмуд

Ундей бўлса майли.

Сайёра

Қайтиб ҳузурингга келаман.

Сайёра чиқиб кетади. Бир оздан сўнг Қоратегин билан Со-
полтегин қўл-оёғи кишанланган Берунийни олиб киради.

Қоратегин

Мана, султон, олиб келдик Берунийни!

Маҳмуд

Жуда соэ!

Абу Али ибн Сино қани?

Қоратегин

Қочиб кетибди!

Маҳмуд

Бизни холи қолдириングлар! Қоратегин, Маймандий,
Сополтегин, сизлар эса ҳуазуримда қолинглар!

Бошқалар таъзим билан чиқиб кетадилар.

Ахир қўлга тушибсан-ку! Ҳўш, қалайсан, Беруний!
Нима учун йўқлаганда саройимга келмадинг?!

Беруний

Хоҳламадим! Ор қилардим ҳуазурингга келишдан!
Чунки жирканч бир махлуқсан, илму фаннинг душмани!
Жаҳолатнинг маконисан! Нодонликнинг конисан!
Нурга қарши зулумотсан, кўршапалак эрурсан!

Қоратегин

Тилингни тий, Абу Райҳон!

Маҳмуд

Шошма! Майли, сўзласин.

Тили ширин бўлар эмиш ўладиган боланинг!
Кўй, сўзласин, сўнгти дамда юрагида не бўлса.
Сўзла! Кўрқма! Юрагингда нима бўлса сўзлаб қол!
Сўнг пушаймон бўлиб юрма, ҳадемасдан тилингни
Кирқиб олиб, қийма қилиб итларимга ташлайман!

Б е р у н и й

«Тошга ёмғир кор қилурму муттасил ёққан билан»—
Деган гап бор ҳалқ ичида, кор қилмайди сенга сўз!

М а ҳ м у д

Сўзламасанг мажбур қилур сўзламакка жаллодлар!
Қани, сўзла, фурсатинг оз, кўп ўтмасдан ўласан!

Б е р у н и й

Ҳа, биламан, сенинг касби коринг фақат ўлдириш!
Бундан бошқа марҳаматни сендан кутиб бўлмайди.
Сен жаллодсан! Қўлларинг қон! Вужудингдан қон томар!
Тожингга ҳам қон сачраган! Тахtingда ҳам қон изи!

М а й м а н д и й

Оғзингни юм! Ҳұзурингда улуғ султон турибди!

Б е р у н и й

Султон әмас, йиртқич! Иблис!

С о п о л т е г и н

(қилич сүғуриб)

Бас қил! Чопиб ташлайман!

Қ о р а т е г и н

Уэр сўра! Тиз чўк дарҳол!

Б е р у н и й

Тиз чўкмайман ҳеч қачон!

М а ҳ м у д

Кизишманлар!

Беруний

Агар менинг тўғри гапим ёқмаса,
Гапга солиб ўтирмасдан чиқаравер ҳукмингни!

Маҳмуд

Сен нимангга ишонасан?

Беруний

Келажакка! Ҳалқимга!
Авлодларнинг тақдирига ишонаман!

Маҳмуд

Таажжуб!

Мендан сира ҳайиқмасдан ўз фикрини юзимга
Очиқ-ойдин айтадиган одамлар ҳам бор экан...
Ҳа, айтгандай, сенинг тагинг паст әкан деб эшилдим,
Ўтинчиллик қилиб ўтган әкан онанг, шу ростми?

Беруний

Ҳа, рост, онам ўтинчиллик қиласар әди туну кун,
Ўтин териб, ўтин сотиб мени боқсан, улғайтган.
Ҳа, онамнинг териб келган ўтинидан кулбаси,
Вайронаси исиганлар дуо қилган онамни...
Ҳа, онамнинг ўтинида қозонини қайнатган
Етим-есир, ғариблар ҳам ундан миннатдор бўлган...
Менинг онам ҳалол ва пок ҳамда художўй әди...
Таги паст деб ҳалол меҳнат қилгандарни айтмайди.
Таги паст деб ҳалол меҳнат қилгандарни талаған,
Ўғирлаган одамларни, каззобларни айтади!
Менинг тагим, асли зотим сеникidan тозароқ!
Мана, сени таги паст деб айтса бўлур, негаки,
Сенинг отанг турк гуломи Себуктегин ашаддий
Каллакесар, ўғри әди, ҳеч савоб иш қилмаган!
Хиёнатда ўтган бутун умри золим отангнинг!
Сен ҳам жадал бормоқдасан ўз отангнинг йўлидан!

Маҳмуд

Ундаи әмас, янгишасан, мен шариат йўлига,
Дини ислом ишларига ҳаётимни тикканиман.
Ғазавот деб қўлга қилич олган соҳибқиронман!

Беруний

Сўзларингнинг бари ёлғон! Сенга ниқоб — шариат!
Шариатни ниқоб қилиб ҳаё билмас юзингга,
Шариатни, адолатни оёқ ости қилгансан!
Дини ислом әмиш! Ёлғон! Дини ислом баҳона!
Сен худодан юз ўгирган имони йўқ султонсан!

Маҳмуд

Кўп ҳаддингдан ошаверма!

Беруний

Энди жаҳлинг чиқдими!
Модомики, сўз бердингми, тўхтатмагил сўэимдан!
Ҳақиқатни эшишиб ол, бир йўл ҳақгўй одамдан.
Онамдан ҳам азиз юртим Хоразм!
Не кунларни солдинг, жаллод, Хоразмнинг бошига!
Ана, қара, ўт ичида қоврилмоқда Хоразм.
Отларингнинг туёқлари гўдакларнинг бошини
Янчиди! Филларингнинг оёқлари остида
Қанча-қанча бегуноҳлар қолиб кетди!

Маҳмуд

Урушнинг

Қоидаси шундай! Уруш шафқат нима билмайди.
Ўт қўйилур, қон тўкилур, ўлдирилур урушда.

Беруний

Нима учун Хоразмга қўшин тортдинг? Хоразм
Мусулмонлар ўлкаси-ку! Қани ўша шариат!
Дини ислом қайда қолди?

Маҳмуд

Чунки, Маъмун саройи
Сенга ўхшаш даҳрийларга тўлиб кетди, уларга
Жазо бериш менинг эзгу бурчим әди!

Беруний

Баҳона!

Ҳеч мусулмон қилмайдиган ишни қилдинг, нобакор!
Қанча олим, қанча шоир, қанича-қанча аллома
Қиличингдан ҳалок бўлди!

Маҳмуд

Сен ҳам ҳалок бўласан!
Мен сultonман! Бўйсунмаган менга ҳалок бўлади.

Беруний

Сен жаҳолат сultonисан! Мен маърифат шоҳиман!

Маҳмуд

Сен гадосан! Китоблардан бошқа сенинг ниманг бор!

Беруний

Китобларим сенинг барча хазинангдан қимматроқ!
Менинг мулким фан-маърифат! Илму ҳикмат бойлигим!
Мен дунёни бойитишга, гуллатишга келганман.
Сен дунёни ёндиришга, кул қилишга келгансан!
Менинг йўлим равshan, ёруғ, қўлимда фан машъали.
Сенинг йўлинг харобазор, қадамингда қабрлар.
Сен вайрона истайдиган шум ниятли бойқушсан!

Маҳмуд

Вайронамиш!.. Ахир, менинг саройларим жаннат-ку!
Пештоқлари забаржаддан, остонаси тиллодан!

Беруний

Саройларинг одамларнинг суягидан қурилган,
Гарнбларнинг қони би ан қоригансан лойини!
Саноийнинг латифаси өсингдами?

Маҳмуд

Латифа?

Хеч қанақа латифани билмайман!

Беруний

Ҳа, бўлмаса,

Эшитмаган бўлсанг эшит, нима дейди Саноий:

«Бир кун Султон билан вазир овга кета туриб, бир харобанинг ёнидан ўтибдилар. Харобада ўтирган иккита бойқуш бир-бири билан гаплашаётган экан. Вазир бойқушларнинг сухбатига қулоқ солиб йиглабди. Султон ҳайрон бўлиб, нега йиглаётисан, бойқушлар нима деяптилар, деб вазирдан сўрабди. Вазир, бойқушлар бир-бирлари билан қуда бўлмоқчи, бойқушларнинг бири иккинчисидан қизимнинг қалини учун ўн минг хароба берасан деб талаб қиласпти, иккинчиси эса шошма, сабр қил, агар султон Маҳмуд Ғазнавий яна бир йил ҳукм сурса, мен сенга ўн минг эмас, юз минг хароба бераман деяпти, деб жавоб берибди».

Маҳмуд

(бақиради)

Елғон!

Маймандий

Тұхмат!

Маҳмуд

Бунақа гап бўлган эмас!

Маймандий

Бўлмаган!

Беруний

(кулиб)

Бу шоирнинг ҳамда ҳалқнинг сенга берган баҳоси!

Маҳмуд

Сен ўласан, Абу Райхон!

Беруний

Ҳаммамиз ҳам ўламиз!

Ҳеч шубҳасиз, бир ўлим бор ҳамманинг ҳам бошида.
Бирор олдин ўладию бирор кейин ўлади.
Бу табият қонунидир, вақти келса дунёдан —
Мен кетаман.

Маҳмуд

Вақти келди!

Беруний

Шаксиз, сен ҳам кетасан.

Барча қилган ишимиизга тарих гувоҳ бўлади.
Келажакда ҳаммамизни тилга олур авлодлар,
Биримизни яхшилабу биримизни ёмонлаб.
Биримизга раҳмат айтур, биримизни лаънатлар.
Қани, айт-чи, авлодларга сендан нима қолади?
Ҳаробами? Вайронами? Юзинг қора! Кўлинг қон!
Мен дунёга келиб фақат хайрли иш қилдим, ҳа,
Сенга ўхшаб юрт бузмадим, қон тўқмадим, ёқмадим.
Авлодларга мерос бўлиб, бойлик бўлиб ҳалқ учун,
Мендан яхши сўз қолади, мендан китоб қолади.
Фаннинг буюк денгизига ирмоқ бўлиб интилдим.
Фан дарёси азим дарё, у дарёга менинг ҳам
Қилган ишим ҳеч бўлмаса томчи бўлиб қўшилур!

Маҳмуд

Демак, сўзинг тамом бўлди. Жаллод!

Шу топда ютурганча **Масъуд**, орқасидан Унсурий
киради.

Масъуд

Шошманг, отажон!

Берунийга қўл кўтармак гуноҳ әрур, султоним!
Агар уни қатл этсангиз тарих сизни кечирмас.
Авлодларнинг лаънатига, нафратига қолурсиз.
Маърифатнинг хазинаси тугар — агар у ўлса.
Берунийни менга беринг, ундан таълим олайн!
Илм ўрганай Абу Райхон каби улуғ олимдан.
Менга беринг Берунийни! Менга керак Беруний!
Кўпдан бери шогирд бўлгим келар эди устозга.

Унсурӣ

Шаҳзоданинг сўзларига қулоқ осинг, султоним!
Берунийдай алломани кўрган әмас замона!

Масъуд

(Маҳмуднинг оёғига ииқилиб)

Берунийни ўлдирсангиз мени қўшиб ўлдиринг!

Маҳмуд

Тур ўрнингдан! Пирим, яна сиз тушдингиз орага...

Масъуд ўрнидан туради. Маҳмуд ўйчан, Берунийнинг ёнига боради,
унга узоқ тикилиб қарайди.

Абу Райхон олимлигинг қандай, уни билмайман,
Аммо, лекин, мардлигингга, юрагингга қойилман...
Мард экансан, ҳеч ким менга айттолмаган гапларни
Гортинмасдан, ҳайиқмасдан ва ўлимдан қўрқмасдан
Айта олдинг. Майли, қани, кишанини ечинглар...

Қоратегин билан Сополтегин Берунийнинг кишанларини ечишади.

Мана, ўғлим, Берунийни сенга бердим, ола қол;
Нима қилсанг ихтиёринг... пишириб е, хоҳласанг...

• Маҳмуд орқасидан Маймандий, Қоратегин, Сополтегинлар чиқиб кетишади. Масъуд, Унсурӣ Беруний билан йифлаб, қучоқлашиб кўришади.

Масъуд

Азиз устоз, сизни кўрдим, баҳтиёрман!

Беруний

Ташаккур!

Унсурый

Салом сизга улуғ олим, алломаи замона!

Беруний

(қаддини ростлаб узоқларга тикилади. Нурда ҳайкалдай бўлиб кўринади. У мағрур, у голиб)

Салом, баҳтли авлодларим! Салом, баҳтли замонлар! Мен сизларга минг йил оша қизғин салом йўллайман! Қабул этинг бобонгизнинг эзгу саломларини! Мен умримни илму фанга бағишладим — агарда Яна минг йил яшасам ҳам худди шундай қиласдим. Чунки, фанга боғлиқ эрур келажакнинг камоли. Чунки фанда аён бўлур ҳақиқатнинг жамоли. Фан инсоннинг ақлу идрок, заковати, меҳнати, Истеъоди, даҳосининг баҳоси йўқ меваси. Разолатнинг, тубанликнинг кушандаси эрур фан. Олов бўлиб ёндиур фан жаҳолатни, зулматни, Машъал бўлиб ёритур фан инсонларнинг йўлини! Фан бобида яратганим илмий жавоҳирларни Замонанинг ва тарихнинг қўлларига топширдим, Улар сизга меросимни ҳеч шубҳасиз етказгай. Келажакнинг умидлари нур бермакда қўзимга... Авлодларим, дунёда сиз бор экансиз умримнинг Ниҳояси йўққа ўхшаб кўринади ўзимга!..

Парда

Январь—19 апрель, 1973 йил